

# Luka



The Gospel According to Luke in the Arli dialect of the Vlax  
Romani language

## **Luka**

### **The Gospel According to Luke in the Arli dialect of the Vlax Romani language**

© 2018.

Language: Arli (Romani, Vlax)

Dialect: Arli

#### **DRAFT VERSION**

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-25

---

PDF generated using Haiola and XeLaTeX on 25 Apr 2025 from source files dated 25 Apr 2025  
0ae3729f-5fc8-5aa0-b49a-b7759ad04491

## Contents

Luka . . . . .	1
----------------	---

## O evandjelje e Lukasoro

### *Uvod*

<sup>1</sup> Cenimeja Teofile, but džene lelje te pisinen oto događaja save ule maškar amende.

<sup>2</sup> On pisinde ađahar sar so vačerde amende okola kola taro anglunipe dikhle adala događaja hem kola inele sluge zako e Devlesoro lafi.

<sup>3</sup> Ađahar hem me, palo adava so taro anglunipe šukar ispitujindum sa adava, mangljum tuće sa palo redo te pisinav,

<sup>4</sup> te šaj ove uverime dai čače sa adava so injan sikavdo.

### *O anđeo phenela so ka bijandol o Jovan o Krstitelj*

<sup>5</sup> Kad o Irod inele caro ani Judeja, nesavo manuš palo anav Zaharija inele svešteniko e izraelconengoro, oto redo e Avijasoro. E Zaharijasiri romni da inele oto pleme e Aaronesoro. Lakoro anav inele Jelisaveta.

<sup>6</sup> O Zaharija hem i Jelisaveta inele pravedna anglo Devel, adalese so živinde palo sa o naredbe hem o zakonja e Gospodesere.

<sup>7</sup> Olen na ine čhave, adalese so i Jelisaveta našti ine te ačhol khamni, a soduj džene već purandile.

<sup>8</sup> Jekh dive kad e Zaharijasiri grupa oto sveštenici kandlja ano Hram, tegani hem o Zaharija čerela ine pli buti sar svešteniko anglo Devel.

<sup>9</sup> Ov, palo adeti e sveštenikonengoro, barbuteja inele izabirime te đerdini ko Hram e Gospodesoro hem te kadini.

<sup>10</sup> Sar o Zaharija kadini ine ano Hram, sa edobor narodo molini pe ine avri.

<sup>11</sup> A ano Hram e Zaharijase mothovđa pe o anđeo e Gospodesoro, kova terdino ki desno strana oto žrtveniko kotar kadinda pe.

<sup>12</sup> Kad o Zaharija dikhlja le, uznemirinda pe hem but darandilo.

<sup>13</sup> A o anđeo phenđa lese: "Ma dara, Zaharija! O Devel šunđa ti molitva. Ti

romni i Jelisaveta ka bijani će čhave, i ka de le anav Jovan.

<sup>14</sup> Ka ove but radosno zbog leste hem but džene ka radujinen pe so ov ka bijandol,

<sup>15</sup> adalese so ka ovel baro manuš anglo Gospod. Nikad naka pijel mol hem ništa sostar šaj te mačol pe. Ka ovel pherdo e Svetone Duhoja pana pe dajaće ano vođi.

<sup>16</sup> Bute Izraelconen ka irini anglo Gospod, anglo lengoro Devel.

<sup>17</sup> Ka džal anglo Gospod sar glasniko ano duho hem ano zoralipe e prorokosoro e Ilijasoro. Ka mirini e daden lengere čhavencar hem okolen so na šunena ka irini nakori mudrost e pravednikonengiri. Ka pripremini e narodo te oven spremna zako e Gospodesoro aviba."

<sup>18</sup> I o Zaharija pučlja e anđeo: "Sar me te džanav da čače ka ovel adava so phenđan? Me injum purano hem mli romni da beršali."

<sup>19</sup> A o anđeo phenđa lese: "Me injum o Gavriilo, o anđeo kova terđola anglo Devel. Ov bičhalđa man te vačerav tuja hem te anav će akava šukar lafi.

<sup>20</sup> I ače, ka ove laloro, naka šaj te vačere sa đi o dive kad adava ka ovel, adalese so na verujindan mle lafende save ka pherđoven ano pravo vreme."

<sup>21</sup> Sar o anđeo vačeri ine e Zaharijaja, o narodo kova adžicerđa avri čudinda pe so o Zaharija edobor ačhilo ano Hram.

<sup>22</sup> A kad o Zaharija ikliilo, našti ine te vačeri olencar. Čerela ine nesar te mothoj lenđe vastencar, ali ačhilo laloro. O manuš halile da ole ine vizija ano Hram.

<sup>23</sup> Kad pherdile o dive oti lesiri služba ano Hram, o Zaharija irinda pe čhere.

<sup>24</sup> Na nakhlo but, i lesiri romni i Jelisaveta ačhili khamni hem pandž masek na iklili avri taro čher. Phenđa:

<sup>25</sup> "O Gospod čerđa te šaj ačhovav khamni. Akana mothovđa maje pli milost hem cidinda mli lađ anglo manuš."

### *O anđeo phenela e Marijaće so ka bijani e Isuse*

<sup>26</sup> Kad i Jelisaveta inele šofto masek khamni, o Devel bičhalđa ple anđeo e Gavriilo ki diz Nazaret ani regija Galileja.

27 Adari valjanda te legari o lafi e Marijaće koja pana inele čhaj. Oj inele mangli e muršese palo anav Josif, kova inele oto pleme e carosoro e Davidesoro.

28 Kad alo o anđeo, phenda e Marijaće: “Radujin tut! O Gospodi tuja! Ovi but milostivno premala tute!”

29 A i Marija but uznemirinda pe zbog e anđeosere lafija, i pučlja pe so šaj te značini adava pozdrav.

30 A o anđeo phenda laće: “Ma dara, Marije! O Devel mothovđa će pli milost!”

31 Aće, ka ačhove khamni hem ka bijane čhave, i ka de le anav Isus.

32 Ov ka ovel baro hem ka vičini pe Čhavo e Najbare Devlesoro. O Devel o Gospod ka del le o presto lesere pradadesoro e Davidesoro.

33 Ka carujini upro pleme e Jakovesoro zauvek; zako lesoro carstvo naka ovel kraj.”

34 Tegani i Marija pučlja e anđeo: “Sar šaj te ovel adava kad me pana injum čhaj?”

35 A o anđeo phenda laće: “O Sveto Duho ka huljel upra tute hem o zoralipe e Najbare Devlesoro ka učhari tut. Adalese adava čhavo, kole ka bijane, ka ovel sveto hem ka vičini pe Čhavo e Devlesoro.

36 Eće, ti bibi i Jelisaveta da, ko purane berša, ačhili khamni hem ka bijani murše. I oj, kolaće sare džande da našti te ačhol khamni, akanai šov masek khamni.

37 Adalese so o Devel sa šaj te ćerel!”

38 Tegani i Marija phenda: “Aće, sluškinja e Gospodesiri injum. Nek ovel maje palo to lafi.”

I o anđeo dželo olatar.

### *I Marija džala te dikhel e Jelisaveta*

39 Adala dive i Marija spreminda pe hem siđarđa ko bregalo krajo, ki jekh diz ani regija Judeja.

40 Kad resli adari, đerdinda ko čher e Zaharijasoro hem pozdravinda e Jelisaveta.

41 I kad i Jelisaveta šunđa e Marijakoro pozdrav, o čhavoro oti radost zorale mrdinda olaće ano vođi, a oj pherdili e Svetone Duhoja.

42 I bare glasvoja phenda e Marijaće: “Najblagoslovime injan maškaro đuvlja hem blagoslovime o čhavoro kole akhareja ano vođi!

43 Akavai bari čast maje so tu, mle Gospodesiri daj, aljan kora mande.

44 Adalese so, kad šunđum to pozdrav, o čhavoro oti radost zorale mrdinda maje ano vođi.

45 Blago tuće so verujindan da ka ovel adava so phenda će o Gospod!”

### *I Marija hvalini e Devle*

46 Tegani i Marija phenda:

“Mli duša barjari e Gospode;

47 Mloi duho radosno ano Devel, ano mlo Spasitelj,

48 so ulo milostivno upri poniznost ple sluškinjakiri.

I aće, od akana sa o generacije ka phenen da injum blagoslovime đuvli,

49 adalese so bare šukaripa ćerđa maje o Zoralo Devel kasoro i anav sveto!

50 Ovi milostivno e manušenje tari generacija ki generacija kola darana olestar.

51 Ple zorale vasteja ćerđa bare buća; rasfrdinda e manušen kolai barikane ano pumare vile.

52 Peravđa e vladaren taro lengoro prestolje, a vazdinda e poniznonen.

53 Čaljarda e bokhalen šukaripnaja, a čučen muklja e barvalen.

54 Pomožinda e Izraelconende, ple slugende.

Na bisterđa te ovel milostivno  
55 e Avraamese hem lesere potomkonende zauvek, sar so dinda plo lafi amare pradadende.”

56 I Marija ačhili e Jelisavetaja đi sar trin masek, i tegani irinda pe čhere.

### *Bijandilo o Jovan o Krstitelj*

57 A kad alo o vreme i Jelisaveta te bijani, bijanda murše.

58 Kad lakiri familija hem lakere komšije šunde so o Gospod mothovđa laće bari milost, radujinde pe olaja.

59 A kad e čhavore inele ofto dive, koro Zaharija čedinde pe o manuša zako obreziba e čhavoresoro. I mangle te den le lesere dadesoro anav – Zaharija,

60 ali i Jelisaveta phenđa: “Na! Lesoro anav ka ovel Jovan!”

61 A on phende laće: “Niko te familijatar na vićini pe ađahar.”

62 I vastencar pućle e Zaharija savo anav mangela te del ple čhavore.

63 Tegani o Zaharija rodinđa te den le jekh tikori phal zako pisiba hem pisinđa: “Lesoro anavi Jovan.”

I sare začudinde pe.

64 I otojekhvar e Zaharijasoro muj phravdilo hem šaj ine palem te vaćeri, i lelja te slavini e Devle.

65 I uklinđa i dar sa lengere komšijen. Ko sa o bregalo krajo e Judejakoro vaćerđa pe adalestar so ulo.

66 I sare kola šunde adava, razmislinde adalestar hem phende: “Akava čhavoro isi te ovel baro manuš. Čaćei upro leste o vas e Gospodesoro.”

### *O Zaharija prorokujini e Mesijastar hem e Jovanestar*

67 A o Zaharija, e Jovanesororo dad, pherdilo e Svetone Duhoja hem prorokujinđa:

68 “Slava e Gospodese e Izraelesere Devlese,  
adalese so alo hem otkupinđa ple narodo!

69 Vazdinđa amende e zorale Spasitelje oto pleme e carosoro e Davidesoro, ple slugasoro,

70 sar so vaćerđa pana angleder prekalo muja ple svetone prorokongere.

71 Vazdinđa amende zorale Spasitelje te spasini amen amare neprijateljendar

hem sa e manušengere vastendar kola mrzinena amen.

72 Mothovđa milost amare pradadende hem ispuninđa plo sveto savez,

73 i sovli savi halja e Avraamese amare pradadese:

74 so ka ikali amen amare neprijateljengere vastendar

te šaj služina lese bizi dar

75 ani svetost hem ani pravednost anglo leste sa đikote injam dživde.

76 A tu Jovane, mlo čhavo, ka ove pendžardo sar proroko e Najbare Devlesoro,

adalese so ka dža anglo Gospod te pripremine lese o drom.

77 Ka sikave lesere narodo sar te pendžaren o spasenje

prekalo oprostiba lengere grehija

78 zbog amare Devlesoro milosrdno vilo palo savo o svetlost odupral ka avel kora amende sar ikljojba e khamesoro,

79 te svetlini okolende so bešena ani tomina hem ani senka e meribnasiri, te legari amen ko drom oto mir.”

80 A o čhavoro o Jovan barjola ine hem zoraljola ano duho. Kad barilo, živinđa ani pustinja sa đikote na iklilo anglo Izraelci te propovedini.

## 2

### *O Isus bijandilo (Mt 1,18-25)*

1 A ano adava vreme kad o Jovan bijandilo, e rimesoro caro o Avgust naredinđa te ćerel pe popis oto sa o manuša ano carstvo.

2 Adava inele prvo popis ćerdo sar o Kvirinije vladini ine ani Širija.

3 I sa o manuša dzele ko dizja kaj bešle ine lengere preci te prijavinen pe zako popis.

4 Ađahar da o Josif, adalese so inele potomko e carosoro e Davidesoro, dželo tari diz Nazaret oti regija Galileja ko gav Vitlejem oti regija Judeja, kote o David bijandilo.

5 Dželo adari sar te prijavini pe zako popis pe verenicaja e Marijaja koja inele khamni.

6 I sar on inele ano Vitlejem, alo e Marijakoro vreme te bijani.

<sup>7</sup> I bijanda ple prvone čhave. Pačarđa le hem pašljarda le ano jasle adalese so ki gostionica na inele than olende.

*O anđelja vačerena e pastirende so bijandilo o Spasitelj*

<sup>8</sup> Adaja rat paše uzalo Vitlejem inele ne-save pastirija kola arakhena ine pumare bakren ko polje.

<sup>9</sup> I otojekhvar o anđeo e Gospodesoro terdino uzalo lende hem i slava e Gospodesiri osvetlinđa len, i on but darandile.

<sup>10</sup> A o anđeo phenda lende: “Ma daran! Ače, anava tumende šukar lafi oto baro bahtalipe savo ka ovel sa e manušende!”

<sup>11</sup> Avdive, ani e Davidesiri diz bijandilo tumende o Spasitelj kovai o Hrist o Gospod.

<sup>12</sup> A palo akava znako ka pendžaren le: ka arakhen e čhavore pačarde hem sar pašljola ano jasle.”

<sup>13</sup> Otojekhvar uzalo anđeo mothovđa pe bari vojska e anđelendar savi hvalinđa e Devle vačerindoj:

<sup>14</sup> “Slava ko učipe e Devlese, a ki phuv mir e manušende kolencar o Devel zadovoljno!”

<sup>15</sup> I kad o anđelja irinde pe ko nebo, o pastirija phende jekh averese: “Hajde te dža đi o Vitlejem hem te dikha adava so phenda amende o Gospod.”

<sup>16</sup> I dzele sigate, hem arakhle e Marija, e Josife hem e čhavore sar pašljola ano jasle.

<sup>17</sup> A kad dikhle e čhavore, vačerde averende sa so ine lende phendo e čhavorestar.

<sup>18</sup> I inele zadivime sare kola šunde adava so o pastirija vačerde.

<sup>19</sup> A i Marija sa adava garavđa pese ano vilo hem razmislinđa adalestar.

<sup>20</sup> I o pastirija dzelefse slavindoj hem hvalindoj e Devle zako sa okova so šunde hem so dikhle baš ađahar sar so ine lende phendo.

<sup>21</sup> Kad nakhle ofto dive, kad e čhavore valjande te obrezinen, dinde le anav Isus – sar so vičinda le o anđeo angleder so i Marija ačhili khamni.

*E Isuse anena ano Hram*

<sup>22</sup> Kad alo o vreme zako adeti i daj te očistini pe palo e Mojsijasoro zakoni, o Josif hem i Marija ande e Isuse ano Hram ko Jerusalem te preden le e Gospodese

<sup>23</sup> (sar soi pisime ano zakoni e Gospodesoro: “Švako murš prvenco te ovel posvetime e Gospodese”)

<sup>24</sup> hem te den žrtva (sar soi phendo ano zakoni e Gospodesoro: “duj tikore golubija ili duj terne golubija”).

*O Simeon prorokujini*

<sup>25</sup> A ano Jerusalem inele jekh manuš palo anav Simeon. Ov inele pravedno hem pobožno. Adžiceri ine te avel o Mesija te spasini e Izraelconen, hem o Sveto Duho inele upro leste.

<sup>26</sup> O Sveto Duho mothovđa lese da angleder so ka merel, ka dikhel e Gospodesere Mesija.

<sup>27</sup> I o Sveto Duho phenda lese te džal ko Hram, i ov dželo. Tegani o Josif hem i Marija ande e čhavore e Isuse ano Hram sar te ćeren o adeti savoi palo Zakoni.

<sup>28</sup> Kad o Simeon dikhlja e čhavore e Isuse, lelja le ki angali hem hvalinđa e Devle vačerindoj:

<sup>29</sup> “Gospode, akana šaj me, o sluga klo, te merav ano mir sar so phenda maje.

<sup>30</sup> Adalese so mle jača dikhle to spasenje, <sup>31</sup> savo spreminda anglo sa o nacije.

<sup>32</sup> Akava spasenje ka ovel svetlost te mothoj tut avere nacijende hem ka anel slava te narodose, e Izraelconende.”

<sup>33</sup> E Isusesoro dad hem i daj divinde pe adaleja so o Simeon vačerđa olestar.

<sup>34</sup> Tegani o Simeon blagoslovinda len hem phenda e Marijaće, e Isusesere dajaće: “Dikh, akavai čhavoro birime te ćerel buten te peren hem te ušten ano Izrael. Ovi odredime te ovel e Devlesoro znako, ali but džene ka odbacinen le.

<sup>35</sup> Adava ka ovel sar te mothoven pe bute manušengere garavde mislija. A o mači ka posaj ti duša.”

*I Ana zahvalini e Devlese zako Mesija*

<sup>36</sup> A adari da inele i proročica i Ana, i čhaj e Fanuilesiri, oto pleme e Asiresoro. Oj inele ano purane berša. Efta berš živinđa ple romeja,

<sup>37</sup> a palo adava živinđa sar udovica di oftovardešu štarto berš. Stalno inele ano Hram, i dive i rat slavinda e Devle ano postiba hem ano moliba.

<sup>38</sup> I samo so o Simeon završinda ple vačeribnaja, i Ana nakhini di o Josif hem i Marija zahvalindoj e Devlese zako čhavoro. I lelja te vačeri e čhavorestar sarijenđe adari kola adžicerde upro Devel te otkupini o Jerusolim.

<sup>39</sup> Kad o Josif hem i Marija čerde sa soi palo zakoni e Gospodesoro, irinde pe ki pumari diz Nazaret ki Galileja.

<sup>40</sup> A o čhavoro barjola ine hem zorajola. Pherđola ine mudrost hem i milost e Devlesiri inele upro leste.

### *O čhavoro o Isus vačeri e učiteljencar ano Hram*

<sup>41</sup> E Isusesoro dad hem i daj svako berš zako prazniko Pasha džana ine ki diz Jerusolim.

<sup>42</sup> Kad e Isuse inele dešu duj berš, palo adeti, hem ov dželo olencar adari te slavini o prazniko.

<sup>43</sup> Kad nakhlo o prazniko, o Josif hem i Marija lelje te džanfse, a na džande so lengoro čhavo o Isus ačhilo ano Jerusolim.

<sup>44</sup> Sar mislinde dai o Isus maškaro manuša kola putujinde olencar, dzele jekh dive phirindoj, a onda lelje te roden le maškaro pumarende hem maškaro pendžarutne.

<sup>45</sup> I kad našti ine te arakhen le, irinde pe ko Jerusolim te roden le.

<sup>46</sup> I o trito dive arakhle le ano Hram sar bešela maškaro e verakere učitelja, sar šunela len hem pučela len.

<sup>47</sup> I sare kola šunde e Isuse, divinde pe zako lesoro džandipe hem zako lesere odgovorija.

<sup>48</sup> I kad dikhlja le lesoro dad hem lesiri daj, inele iznenadime. Lesiri daj phenđa lese: "Mlo čhavo, vačer sose adava čerdan amende? To dad hem me but darandiljam hem rodinđam tut!"

<sup>49</sup> A o Isus pučlja len: "Sose rodinđen man? Na džanden li so valjani te ovav ano čher mle Dadesoro?"

<sup>50</sup> A i Marija hem o Josif na halile so o Isus manglja te phenel lenđe adaleja.

<sup>51</sup> I palo adava, o Isus irinda pe olencar ko Nazaret hem ine lenđe poslušno. A lesiri daj garavđa pese ano vilo sa adava so ulo.

<sup>52</sup> A o Isus ulo po mudro hem barjola ine ano telo, hem sa više barjola ine ano jača e Devlese hem e manušenđe.

## 3

### *O Jovan o Krstitelj pripremini o drom e Isusese*

*(Mt 3,1-12; Mk 1,1-8; Jn 1,19-28)*

<sup>1</sup> Kad o caro o Tiberija vladinda upro e Rimesoro carstvo dešupandžto berš, o Pontije Pilat vladinda ani Judeja, o Irod vladinda ani Galileja, a lesoro phral o Filip vladinda ani Itureja hem ani Trahonitada, o Lisanije vladinda ani Avilina,

<sup>2</sup> hem o Ana hem o Kajafa inele šerutne sveštenici, o lafi e Devlesoro alo e Zaharijasere čhavese e Jovanese ki pustinja.

<sup>3</sup> I o Jovan dželo ko sa o krajo e lenjakoro Jordan te propovedini e manušenđe da valjani te pokajinen pe zako pumare grehija hem te oven krstime sar te mothoven dai lenđe oprostime o grehija.

<sup>4</sup> Sar so angleder pisinda o proroko o Isaija, o Jovan inele

"o glaso so vičini ani pustinja:  
'Pripreminen o drom e Gospodese,  
ravnonen lese o droma!

<sup>5</sup> Svako dolina te pherđol  
a svako planina hem brego te peren!  
O bange droma te oven ispravime  
a o neravna droma te oven ravnome!

<sup>6</sup> I sa o manuša ka dikhen e Devlesoro spasenje.'"

<sup>7</sup> Akava o Jovan vačerđa butenđe kola iklile te krstini len: "E sapengere čhavalen! Ko vačerđa tumenđe da šaj te našen oti e Devlesiri holi savi avela?"

<sup>8</sup> Tumare životeja mothoven da čače pokajinđen tumen! I ma mislinen dai



dovoljno te phenen: 'Amaroi pradad o Avraam.' Phenava tumenđe da o Devel hem akale barendar šaj te vazdel čhaven e Avraamese.

<sup>9</sup> Ače o tover oto sudo e Devlesoroi već vazdime te čineli o kašta ano koreno. I svako kaš savo na bijani šukar bijandipe ka čineli pe hem ka frdel pe ani jag."

<sup>10</sup> A o narodo pučlja le: "So valjani te čera?"

<sup>11</sup> O Jovan phenđa lenđe: "Kas isi duj gada, jekh valjani te del okolese kas nane. A kas isi hajbnase, te čerel isto ađahar."

<sup>12</sup> Nesave carinici da ale te krstini len o Jovan, i pučle le: "Učitelju, so amen te čera?"

<sup>13</sup> A ov phenđa lenđe: "Ma roden buderi porez okolestar so o zakoni phenela tumenđe te roden."

<sup>14</sup> I nesave vojnici da pučle e Jovane: "A so amen te čera?"

A ov phenđa lenđe: "Nikastar ma len pare ki sila ili so ka tužinen len hovavne hem oven zadovoljna tumara plataja."

<sup>15</sup> A o narodo adžicerđa e Mesija hem sare pučle pe nane li o Jovan adava.

<sup>16</sup> Adalese o Jovan phenđa sarijenđe: "Me krstinava tumen panjeja, ali avela o po baro mandar, kase na injum dostojno ni o dorikha oti obuća te phravav. Ov ka krstini tumen e Svetone Duhoja hem jagaja.

<sup>17</sup> Ano vas lese i lopata te čistini o gumno plo hem te odvojini o điv taro ljuške. O điv ka čivel pese ki šupa, a o ljuške ka tharel jagaja savi nikad na mudarđola."

<sup>18</sup> Ađahar, sar hem bute avere lafencar o Jovan vačerđa lenđe o Šukar lafi.

<sup>19</sup> A e vladare e Irode o Jovan ukorinđa adalese so lelja romnjaće ple phralesere romnja e Irodijada hem zako but avera bišukar buća save čerđa.

<sup>20</sup> Tegani o Irod čerđa aver bišukaripe: čhivđa e Jovane ko phandlipe.

### *O Jovan krstini e Isuse*

*(Mt 3,13-17; Mk 1,9-11)*

<sup>21</sup> Kad sa o manuša krstinde pe, krstinđa pe hem o Isus. I tegani sar o Isus molini pe ine, phravdilo o nebo,

<sup>22</sup> a o Sveto Duho huljilo upro leste ano oblik e golubesoro. A taro nebo šundilo o

glaso e Devlesoro: "Tu injan mlo Čhavo o volime! Tuja injum bahtalo!"

### *E Isusesoro poreklo*

*(Mt 1,1-17)*

<sup>23</sup> O Isus počinda pli služba anglo narodo kad inole đi ko trijanda berš. O narodo smatrinda dai o Isus čhavo e Josifesoroi.

O Josif inele čhavo e Ilijasoro.

<sup>24</sup> O Ilija inele čhavo e Matatesoro.

O Matat inele čhavo e Levijesoroi.

O Levije inele čhavo e Melhisoro.

O Melhi inele čhavo e Janajesoro.

O Janaj inele čhavo e Josifesoroi.

<sup>25</sup> O Josif inele čhavo e Matatijesoroi.

O Matatije inele čhavo e Amosesoro.

O Amos inele čhavo e Naumesoro.

O Naum inele čhavo e Eslijasoro.

O Eslija inele čhavo e Nangejesoro.

<sup>26</sup> O Nangej inele čhavo e Maatesoro.

O Maat inele čhavo e Matatijesoroi.

O Matatije inele čhavo e Semeinesoro.

O Semein inele čhavo e Josihesoroi.

O Josih inele čhavo e Jodasoro.

<sup>27</sup> O Joda inele čhavo e Joananesoro.

O Joanan inele čhavo e Risasoro.

O Risa inele čhavo e Zorovavelesoro.

O Zorovavel inele čhavo e Salatiilesoro.

O Salatiil inele čhavo e Nirisoroi.

<sup>28</sup> O Niri inele čhavo e Melhisoro.

O Melhi inele čhavo e Adisoroi.

O Adi inele čhavo e Kosamesoro.

O Kosam inele čhavo e Elmadamesoro.

O Elmadam inele čhavo e Iresoro.

<sup>29</sup> O Ir inele čhavo e Isusesoro.

O Isus inele čhavo e Eliezeresoroi.

O Eliezer inele čhavo e Jorimesoro.

O Jorim inele čhavo e Matatesoro.

O Matat inele čhavo e Levijesoroi.

<sup>30</sup> O Levije inele čhavo e Simeonesoro.

O Simeon inele čhavo e Judasoro.

O Juda inele čhavo e Josifesoroi.

O Josif inele čhavo e Jonamesoro.

O Jonam inele čhavo e Eliakimesoro.

<sup>31</sup> O Eliakim inele čhavo e Melejasoro.

O Meleja inele čhavo e Menasoro.

O Mena inele čhavo e Matatasoro.

O Matata inele čhavo e Natanesoroi.

O Natan inele čhavo e Davidesoroi.

<sup>32</sup> O David inele čhavo e Jesejesoro.

O Jesej inele čhavo e Jovidesoro.

O Jovid inele čhavo e Voozesoro.

O Vooz inele čhavo e Salmonesoro.  
 O Salmon inele čhavo e Naasonesoro.  
<sup>33</sup> O Naason inele čhavo e Aminadavesoro.  
 O Aminadav inele čhavo e Adminesoro.  
 O Admin inele čhavo e Arnisoro.  
 O Arni inele čhavo e Esromesoro.  
 O Esrom inele čhavo e Faresesoro.  
 O Fares inele čhavo e Judasoro.  
<sup>34</sup> O Juda inele čhavo e Jakovesoro.  
 O Jakov inele čhavo i Isaakesoro.  
 O Isaak inele čhavo e Avraamesoro.  
 O Avraam inele čhavo e Tarasoro.  
 O Tara inele čhavo e Nahoresoro.  
<sup>35</sup> O Nahor inele čhavo e Seruhesoro.  
 O Seruh inele čhavo e Ragavesoro.  
 O Ragav inele čhavo e Falekesoro.  
 O Falek inele čhavo e Everesoro.  
 O Ever inele čhavo e Salasoro.  
<sup>36</sup> O Sala inele čhavo e Kainamesoro.  
 O Kainam inele čhavo e Arfaksadesoro.  
 O Arfaksad inele čhavo e Simesoro.  
 O Sim inele čhavo e Nojesoro.  
 O Noje inele čhavo e Lamehesoro.  
<sup>37</sup> O Lameh inele čhavo e Matusalasaroro.  
 O Matusala inele čhavo e Enohesoro.  
 O Enoh inele čhavo e Jaretesoro.  
 O Jaret inele čhavo e Malaleilesoro.  
 O Malaleil inele čhavo e Kainamesoro.  
<sup>38</sup> O Kainam inele čhavo e Enosesoro.  
 O Enos inele čhavo e Sitesoro.  
 O Sit inele čhavo e Adamesoro.  
 O Adam inele čhavo e Devlesoro.

## 4

*E Isuse ki pustinja kušini o beng*  
*(Mt 4,1-11; Mk 1,12-13)*

<sup>1</sup> A o Isus, pherdo e Svetone Duhoja, irinda pe tari len Jordan; i oto Duho inele legardo ki pustinja,

<sup>2</sup> kaj inele saranda dive iskušime e bengestar. I na halja ništa adala dive, a kad nakhle adala dive, tegani bokhalilo.

<sup>3</sup> I o beng phenđa lese: “Te injan o Čhavo e Devlesoro, vačer akale barese te ovel maro.”

<sup>4</sup> A o Isus phenđa lese: “Pisimei ano Sveto lil: ‘O manuš naka živini samo oto maro.’”

<sup>5</sup> I o beng legarda le ko učo than hem otojehvar mothovđa lese sa o carstvija e phuvjakere,

<sup>6</sup> i phenđa lese: “Tuće ka dav sa akava zoralipe hem i slava olengiri adalese soi maje dindi, i dava la kase me mangava.

<sup>7</sup> Adalese, te peljan ko kočija angla mande, sa ka ovel klo.”

<sup>8</sup> I o Isus phenđa lese: “Pisimei ano Sveto lil: ‘Per ko kočija samo anglo Gospod, to Devel, hem samo ole kande!’”

<sup>9</sup> I o beng anda le ko Jerusalem hem čhivđa le upro naj učo than e Hramesoro hem phenđa lese: “Te injan o Čhavo e Devlesoro, frde tut akatar tele!

<sup>10</sup> Adalese soi pisime:

‘Ka naredini ple andelende te arakhen tut,

<sup>11</sup> te akharen tut ko vasta te na khuve tut preja ko bar.’”

<sup>12</sup> O Isus phenđa lese: “Hem akavai phendo ano Sveto lil:

‘Ma kušin e Gospode, te Devle.’”

<sup>13</sup> I kad završinda svako kušnja, o beng cidinda pe olestar di nesavi aver prilika.

*O Isus sikaj ani Galileja*  
*(Mt 4,12-17; Mk 1,14-15)*

<sup>14</sup> I o Isus irinda pe ki regija Galileja ano zoralipe e Duhosoro, i šundilo o glaso olestar ko sa o krajo.

<sup>15</sup> I sikavđa e manušen olenđe ano sinagoge hem inele pohvalime sarijendar.

*E Isuse ispuđinena taro Nazaret*  
*(Mt 13,53-58; Mk 6,1-6)*

<sup>16</sup> I o Isus alo ki diz Nazaret kote barilo hem, palo plo adeti ko savato, đerdinda ki sinagoga. Uštino te čitini,

<sup>17</sup> a ine lese dindo o lil e prorokosoro e Isajasaroro. Ov phravđa o lil hem arakhlja o than kaj inele pisime:

<sup>18</sup> “O Duhoi e Gospodesoro upra mande, adalese so pomazinda man te vačerav o šukar lafi e čororende. Bičhalđa man te proglasinav e phandlende da ka oven oslobodime, e kororende da ka irini pe lende o dikhiba,

e mučimende da ka oven slobodna,  
<sup>19</sup> te proglasinav o adžicerdo berš oti e Gospodesiri milost.”

20 Tegani phandlja o lil, irinđa le e slugaste, i beštino te sikaj. I sare ani sinagoga dikhle ano leste.

21 A o Isus lelja te vačeri lenđe: “Avdive pherdile akala lafija save šunden tumare kanencar.”

22 I sare šukar vačerde olestar hem inele zadivime oto šukar lafija save iklile lesere mujestar, i vačerde: “Nane li ov e Josifesoru čhavo?”

23 A ov phenđa lenđe: “Čače ka vačeren maje akaja poslovica: ‘Doktore, sasljar korkore tut!’ So šunđam so ulo ano Kafarnaum, čer hem akate, ano to than kaj bariljan.”

24 I phenđa: “Čače, vačerava tumenđe, nijekh proroko nane prihvatime ano plo than kaj barilo.

25 I čače, vačerava tumenđe, inele but udovice ano Izrael e Ilijase ano vreme, kad na pelo bršim trin berš hem šov masek i ulo baro bokhalipe ki sa i phuv.

26 I nijekhače olendar na inele bičhaldo o Ilija sem e udovicače ki e abandijengiri diz Sarepta uzalo Sidon.

27 I inele but gubavci ano Izrael ano vreme e prorokosoro e Jelisejesoro, i nijekh olendar na inele sasljardo, sem o Neman o Sirijco.”

28 I sare ani sinagoga pherdile holi kad šunde adava.

29 I uštine hem ispudinde le tari diz, i legarde le upre ko brego upro savo lengiri diz inele vazdime te šaj frden le odupral.

30 Ali o Isus nakhino maškar olende hem dželo.

### *O Isus ispudini e demone e manušestar (Mk 1,21–28)*

31 I o Isus huljilo ani e galilejakiri diz Kafarnaum, i sikavđa e manušen ko savato.

32 I on inele zadivime lesere sikavibnaja adalese so lesoro vačeriba inele ano autoritet.

33 A adari, ani sinagoga, inele manuš opsednutime e demonesere bišukare duhoja hem oto sa o glaso vičindā:

34 “Oh, so mangeja amendar, Isuse Nazarećanine? Aljan li te uništine amen? Džanav ko tu injan: o Sveco e Devlesoro.”

35 Tegani o Isus ukorinđa le: “Phand to muj hem ikljov olestar!”

I o demoni frdinđa le ki phuv anglo sarijende, iklilo olestar hem ni hari na dukhavđa le.

36 I sare but začudinde pe hem vačerde jekh avereja ađahar: “Savo li vačeriba adava da ano autoritet hem ano zoralipe naredini e bišukare duhende te ikljon hem on ikljona?”

37 I o glaso e Isusestar šundilo ko sa o pašutne thana.

### *O Isus sasljari e Petresere sasuja hem bute averen*

*(Mt 8,14–17; Mk 1,29–39)*

38 O Isus iklilo tari sinagoga hem dželo ko čer e Simonesoro. E Simonesere sasuja inele bari jag. I on zamolinde le te sasljari la.

39 I o Isus terdino uzalo late, naredinđa e jagače hem oj muklja la. I odmah uštini hem lelja te poslužini len.

40 Kad o kham huljilo, sarijen kolen inele namborme manuša oto razna nambormipa, ande len koro Isus. A ov upra svakoneste olendar čhivđa ple vasta hem sasljarda len.

41 A butendar da iklile o demonja vičindoj hem vačerindoj: “Tu injan o Čhavo e Devlesoro!”

O Isus pretinđa len hem na muklja lenđe te vačeren adalese so džande dai ov o Hrist.

42 Kad dislilo, o Isus iklilo tari diz hem dželo ko jekh čučo than. I but džene rodinde le. Ale đi leste hem na mukena le ine te džalfse olendar.

43 A ov phenđa lenđe: “I ko avera dizja valjani te vačerav o šukar lafi oto carstvo e Devlesoro adalese so zako adava injum bičhaldo.”

44 I o Isus nastavinda te propovedini ano e judejakere sinagoge.

## 5

### *O Isus vičini e prvone učenikonen (Mt 4,18–22; Mk 1,16–20)*

1 A jekhvar but džene gurinde pe uzalo Isus te šunen o lafi e Devlesoro, a ov terdino uzalo e Galilejakoro jezero.

<sup>2</sup> I dikhlja duj čamcija uzalo jezero savendar iklile o manuša kola dolena mačhen adalese so thovena ine pumare mreže.

<sup>3</sup> I đerdinda ano jekh čamco, kova inele e Simonesoru, i zamolinda le te cidel pe hari e phuvjatar, i bešindoj ano čamco, sikavđa e narodo.

<sup>4</sup> A kad završinda o vačeriba, phenda e Simonese: “Dža e čamcoja ko hor hem frden tumare mreže te šaj dolen mačhen.”

<sup>5</sup> A o Simon phenda: “Gospodarona, sa i rat trudindam amen i ništa na dolindam, ali te tu pheneja, ka frdav o mreže.”

<sup>6</sup> I kad ćerde adava, dolinde sa edobor mačhen i lengere mreže lelje te pharavđon.

<sup>7</sup> I vastencar mothovde pumare amalende, kola inele ko aver čamco, te aven te pomožinen lende. I on ale hem pherde soduj čamcija edobor da lelje te pherđon pani.

<sup>8</sup> A kad dikhlja adava o Simon o Petar, pelo ko kočija anglo Isus vačerindoj: “Dža mandar, Gospode, me injum grešno manuš!”

<sup>9</sup> Adalese so i dar prelelja ole hem sarijen kola inele oleja zbog o baro doliba e mačhengoro.

<sup>10</sup> Ađahar da i dar dolinda e Jakove hem e Jovane, e Zevedejesere čhaven, kola inele e Simonesere amala.

I o Isus phenda e Simonese: “Ma dara! Od akana manušen ka dole.”

<sup>11</sup> I kad ikalde o čamcija upri phuv, ačhavde sa hem dzele palo leste.

### *O Isus sasljari e gubavco (Mt 8,1-4; Mk 1,40-45)*

<sup>12</sup> I jekhvar o Isus inele ki nesavi diz, i nekotar anglo leste iklilo manuš pherdo gubaja. So dikhlja e Isuse, pelo anglo leste mujeja di phuv hem molinda le vačerindoj: “Gospode, te mangeja, šaj te sasljare man!”

<sup>13</sup> I o Isus pružinda plo vas, dolinda le hem phenda: “Mangava, ov sasljardo!”

I otojekhvar i guba cidinda pe olestar.

<sup>14</sup> Tegani naredinda lese: “Ma vačer nikase akalestar, nego dža mothov tut e sveštenikose hem de žrtva zako to

očistiba, sar so naredinda o Mojsije, zako svedočanstvo olende.”

<sup>15</sup> A o glaso e Isusestar šundola ine sa po dur, i but džene čedena pe ine te šunen le hem te oven sasljarde oto pumare nambormipa.

<sup>16</sup> A ov cidela pe ine ko čuče thana hem molini pe.

### *E Isuse isi pravo te oprostini o grehija (Mt 9,1-8; Mk 2,1-12)*

<sup>17</sup> I jekh dive o Isus sikavđa ano jekh čher, a o fariseja hem o učitelja e Zakonestar, kola ale oto sa e galilejakere hem judejakere gava hem oto Jerusalem, beštine adathe. A o zoralipe e Gospodesoro inele upro Isus te sasljari.

<sup>18</sup> I nesave manuša ande upri nosiljka jekhe manuše kova našti ine te phirel ni te mrdini. Mangle te anen le andre hem te čhiven le anglo Isus.

<sup>19</sup> I adalese so taro narodo našti ine te arakhen kotar te anen le andre, uklinde upro čher, ćerde rupa ko tavani hem adathar mukle le sa e nosiljkaja ko maškar anglo Isus.

<sup>20</sup> I kad o Isus dikhlja lengiri vera, phenda: “Manušeja, oprostimei će te grehija!”

<sup>21</sup> I o fariseja hem o učitelja e Zakonestar pučle pe ana pumende: “Kovai akava so hulini? Ko šaj te oprostini o grehija sem o jekh Devel?”

<sup>22</sup> A o Isus džanda lengere mislija, i phenda lende: “Sose ađahar mislinena?”

<sup>23</sup> Soi po lokhe te phenel pe: ‘Oprostimei će te grehija’ ili te phenel pe: ‘Ušti hem phir’?

<sup>24</sup> Ka dokažinav tumende da man, e Čhave e manušesere, isi pravo ki phuv te oprostinao grehija.” Tegani phenda e manušese kova našti ine te phirel: “Tuće vačerava! Ušti, le ti nosiljka hem dža čhere!”

<sup>25</sup> I o manuš odmah uštino anglo lende, lelja i nosiljka hem dželo čhere slavindoj e Devle.

<sup>26</sup> I sare začudinde pe, hvalinde e Devle, pherdile dar hem vačerde: “Avdive dikhljam bare čudesija!”

*O Isus alo te vičini e grešnikonen ko pokajanje*

*(Mt 9,9–13; Mk 2,13–17)*

<sup>27</sup> I palo adava, o Isus iklilo adathar hem dikhlja e cariniko palo anav Levije sar bešela ko than kotar čedela pe o porez, i phenđa lese: “Phir pala mande!”

<sup>28</sup> I ov uštino, ačhavđa sa hem dželo palo leste.

<sup>29</sup> I o Levije spreminda lese baro hajba pese ano čher, hem adari inele but carinici hem avera kola beštine olencar uzalo astali.

<sup>30</sup> Tegani o fariseja hem lengere učitelja e Zakonestar lelje te buninen pe vačerindoj e Isusesere učenikonende: “Sose tumen hana hem pijena e carinikonencar hem avere grešnikonencar?”

<sup>31</sup> I o Isus phenđa lenđe: “E sastenđe na valjani doktori, nego e nambormenđe.

<sup>32</sup> Me na aljum te vičinar ko pokajanje e pravednikonen, nego e grešnikonen.”

*E Isusesoroi sikaviba nevo*

*(Mt 9,14–17; Mk 2,18–22)*

<sup>33</sup> A on phende lese: “E Jovanesere e Krstiteljesere učenici but postinena hem molinena, adahar hem e farisejengere učenici, a te učenici hana hem pijena.”

<sup>34</sup> A o Isus phenđa lenđe: “Sar šaj te terinen e mladoženjasere amalen te postinen kadi olencar o mladoženja?”

<sup>35</sup> Ali ka aven o dive kad o manuša ka len lendar e mladoženja. Tegani, ko adala dive, ka postinen.”

<sup>36</sup> I vačerđa lenđe akaja uporedba: “Niko na sivela o kotor e neve fostanestar ko purano fostani sar te pherel i rupa; adalese so hem o nevo ka pharavđol, a ko purano naka avel o kotor e nevestar.

<sup>37</sup> I niko na chorela i nevi mol ano purane morča. Te čerđa pe adahar, kad i nevi mol ka zretoni, ka pharaj o morča hem ka čordol, a o morča ka oven uništine.

<sup>38</sup> Nego, i nevi mol valjani te čhorel pe ano neve morča.

<sup>39</sup> I nijekh, kova pilja i purani mol, na mangela i nevi, adalese so vačeri: ‘dovoljnoi i purani’.”

## 6

*O Isus po baro hem oto savato*

*(Mt 12,1–8; Mk 2,23–28)*

<sup>1</sup> Ko jekh savato o Isus nakhino maškaro njive. A lesere učenici čedinde e đivesoro klaso, morde le vastencar hem hale.

<sup>2</sup> Tegani nesave fariseja phende: “Sose čerena adava so palo Zakoni na tromal pe ko savato?”

<sup>3</sup> O Isus phenđa lenđe: “Na čitinden li ano Sveto lil adava so čerđa o David kad bokhalile ov hem okola so inele oleja?”

<sup>4</sup> Đerdinda ano čher e Devlesoro, lelja hem halja o posvetime maro, savo nikase na inele muklo te han sem e sveštenikonende, hem čak dinda le okolende so inele oleja te han.”

<sup>5</sup> I phenđa lenđe: “Me, o Čhavo e manušesoro, injum gospodari e savatesoro.”

*O Isus sasljari ko savato*

*(Mt 12,9–14; Mk 3,1–6)*

<sup>6</sup> Ko aver savato, o Isus đerdinda ki sinagoga hem sikavđa. I adari inele jekh manuš kasoro desno vas inele šuko.

<sup>7</sup> Tegani o učitelja e Zakonestar hem o fariseja posmatrinena le ine te dikhen na li ko savato ka sasljari, sar te šaj tužinen le.

<sup>8</sup> A ov džanda lengere mislija hem phenđa e manušese kas inele šuko vas: “Ušti hem terđov ko maškar!”

I ov uštino hem terdino.

<sup>9</sup> A o Isus phenđa lenđe: “Te pučav tumen: so tromal pe te čerel pe ko savato: šukaripe ili bišukaripe? Te spasini pe o dživdipe ili te uništini pe?”

<sup>10</sup> I dikhindoj ano sarijende, phenđa lese: “Pružin to vas!”

I ov čerđa adahar hem lesoro vas ulo sasto.

<sup>11</sup> A o fariseja hem o učitelja e Zakonestar pherdile bari holi hem vačerde maškara pumende so šaj te čeren e Isuseso.

*O Isus birini dešu duje apostolen*

*(Mt 10,1–15; Mk 3,13–19)*

<sup>12</sup> Adala dive, o Isus dželo ki gora te molini pe. I nakhavđa sa i rat ani molitva e Devlese.

13 Kad dislilo, vičinda kora peste ple učeníkonen hem birinda olendar dešu dujen, kolen vičinda apostolja:

14 e Simone kole vičinda Petar, hem lesere phrale e Andreja, e Jakove hem e Jovane, e Filipe

hem e Vartolomeje,

15 e Mateje

hem e Toma,

e Jakove e Alfejesere čhave

hem e Simone kovai vičime Zilot,

16 e Juda e Jakovesere čhave, hem e Juda e Iskariote, kova ulo izdajniko.

*O Isus sikaj oto bahtalipe hem oto pharipe*

*(Mt 4,23-5,12)*

17 I o Isus huljindoj olenar, terdino ko ravno than. A adari inele sa edobor lesere učeníci hem but narodo taro but thana e judejakere, di hem tari diz Jerusalm, hem taro e tiresere hem e sidonesere pašutne thana savei uzalo more.

18 Ale te šunen le hem te oven sasljarde oto pumare nambormipa. A saslile hem okola kolen mučinde o bišukar duhija.

19 I sa o manuša rodinde te pipinen le adalese so baro zoralipe ikljola ine olestar hem sasljari sarijen.

20 I o Isus dikhlja ano ple učeníci, i lelja te vačeri:

“Bahtale injen tumen o čorore, adalese soi o carstvo e Devlesoro tumaro!

21 Bahtalei okola kolai akana bokhale, adalese so o Devel ka čaljari tumen!

Bahtalei okola kola akana rovena, adalese so ka asan!

22 Bahtale injen kad o manuša mrzinena tumen, kad odbacinena tumen, uvredinena tumen

hem lađarena tumen da injen bišukar adalese so verujinena ana mande, ano Čhavo e manušesoro!

23 Tegani radujinen tumen hem ripinen oto bahtalipe, adalese so adžičeri tumen bari nagrada ko nebo! Adalese so, ađahar

čerena ine hem lengere pradada e pro-rokonencar.

24 Ali jao tumenđe e barvalenđe, adalese so već leljen tumari uteha!

25 Jao tumenđe kola akana injen čaljarde, adalese so ka oven bokhale!

Jao tumenđe kola akana asana, adalese so ka tugujinen hem ka roven!

26 Jao tumenđe kad sa o manuša vačerena šukar tumendar, adalese so ađahar vačerena ine hem lengere pradada e hovavne pro-rokonendar.”

*Volinen tumare neprijatelj*

*(Mt 5,38-48; 7,12)*

27 “A vačerava tumenđe so šuřena: Volinen tumare neprijatelj! Čeren šukaripe okolende so mrzinena tumen!

28 Blagoslovinen okolen so dena tumen armanja! Molinen tumen okolende so čerena tumenđe bišukaripe!

29 Okolese kova khuvela tut ki čham, irin hem aver čham. Okolese kova lela to ogrtači, ma zabranin te lel tutar hem o gad.

30 De svakonese kova rodela tutar nešto, hem te neko lela okova soi klo, ma rode adava palal.

31 I sar so mangena avera te čeren tumenđe, ađahar čeren tumen olenđe.

32 Te volinena samo okolen kola tumen volinena, savi pohvala šaj te dobinen? Adalese so hem o grešnici volinena okolen kola olen volinena.

33 Ađahar da, te čerđen šukaripe okolende kola tumenđe čerena šukaripe, savi pohvala šaj te dobinen? Hem o grešnici čerena ađahar.

34 Te dinden ko zajam pare okolende kastar adžičerena te irinen tumenđe, savi pohvala šaj te dobinen? Hem o grešnici dena ko zajam jekh averese te šaj irini pe lenđe edobor.

35 Nego, volinen tumare neprijatelj, čeren lenđe šukaripe hem den len ko zajam bizo nisavo adžičeriba te irini pe tumenđe adava! I o Devel ka del tumen bari nagrada. I ka oven čhave e Najbare-sere, adalese soi ov šukar hem premalo nezahvalna hem premalo bišukar.

36 Oven milosrdna sar soi milosrdno tumaro Dad kovai ano nebo!”

*O Isus sikaj te na sudina averen  
(Mt 7,1-6)*

<sup>37</sup> “Ma sudinen hem čače naka sudini pe tumenđe! I ma osudinen hem čače naka oven osudime! Oprostinen hem ka oprostini pe tumenđe!

<sup>38</sup> Den hem ka del pe tumenđe: mera šukar, pritiskime, tresime hem prepherdi ka čhivel pe tumenđe ki angali. Adalese so, sava meraja merinena, esavkaja ka merini pe tumenđe.”

<sup>39</sup> I vačerđa lenđe akaja uporedba: “Šaj li o kororo te legari e korore? Na li soduj ka peren ki rupa?

<sup>40</sup> Nane o učeniko upreder o učitelj. I svako kovai sikavdo sa, ka ovel samo sar plo učitelj.

<sup>41</sup> A sose dikheja i trunka ani jakh te phralesiri, a i greda ani ti jakh na primetineja?

<sup>42</sup> Sar šaj te phene te phralese: ‘Phrala, aš te ikalavtar i trunka oti jakh’, a korkoro na dikheja i greda ani ti jakh? Dujemujengereja, najangle ikal i greda te jakhatar, i tegani šukar ka dikhe te ikale i trunka te phralesere jakhatar.”

*So ikljola oto šukar hem oto bišukar vilo  
(Mt 7,17-20; 12,37)*

<sup>43</sup> “Nijekh šukar kaš na dela bišukar plod, sar so nijekh bišukar kaš na dela šukar plod.

<sup>44</sup> Adalese so svako kaš pendžari pe palo lesoro plod. Sar so džanen, o smokve na čedena pe oto kare ni o drakha na čedena pe oti kupina.

<sup>45</sup> E šukare manuše isi šukaripe ano vilo, i ađahar, ple vilestar ikali šukaripe, a o bišukar manuš ple vilestar ikali bišukaripe. Adalese so e manušesoro muj vačeri adava sojai lesoro vilo pherdo.”

*E Isusesoroi sikaviba šukar temelji  
(Mt 7,24-27)*

<sup>46</sup> “Sose vičinena man: ‘Gospode, Gospode!’, a na čerena okova so vačerava?

<sup>47</sup> Svako kova avela mande hem šunela mle lafija hem čerela len, ka mothovav tumenđe upra kastei:

<sup>48</sup> Ovi upro manuš kova čerindoj plo čher handlja hem čerđa hor, čerđa o temelji upro bar hem vazdinđa o čher. I kad ale o panja, i len khuvđa ko adava čher, ali našti ine te potresini le adalese soi čerdo šukar.

<sup>49</sup> A okova kova šunđa mle lafija, a na čerđa len, ovi upro manuš kova čerđa plo čher ki phuv bizo temelji, ko savo khuvđa i len hem otojekhvar peravđa le, i oto čher uli bari ruševina.”

## 7

*E kapetanesiri zoral vera  
(Mt 8,5-13; Jn 4,43-54)*

<sup>1</sup> A kad o Isus završindđa plo vačeriba anglo narodo, đerdindđa ki diz Kafarnaum.

<sup>2</sup> A jekhe rimljanengere kapetane, kova inele upreder šel vojnici, ine sluga kova inele namborme, anglo meriba, a cenindđa le.

<sup>3</sup> I kad o kapetani šunđa e Isuses, bičhalđa koro leste nesave jevrejengere starešinen te pučen le te šaj avel te saslari lesere sluga.

<sup>4</sup> A kad ale koro Isus, šukar zamolinde le vačerindoj: “Ov zaslužini te čere lese adava,

<sup>5</sup> adalese so volini amare narodo, a čerđa amende hem sinagoga.”

<sup>6</sup> I o Isus dželo olencar.

A kad inele paše uzalo čher, o kapetani bičhalđa lese ple amalen vačerindoj: “Gospode, ma mučin tut, adalese so na injum dostojno te đerdine maje ko čher.

<sup>7</sup> Adalese na dikhljum man dostojno te avav đi tute. Nego samo naredin hem mlo sluga ka ovel sasto.

<sup>8</sup> Adalese so hem me injum manuš talo autoritet, hem isi man vojnici teleder mande. I jekhesse vačerava: ‘Dža!’, i ov džala. A averese vačerava: ‘Ava!’, i ov avela. A mle slugase vačerava: ‘Čer adava!’, i ov čerela.”

<sup>9</sup> A kad o Isus šunđa adava olestar, iznenadindđa pe, irindđa pe nakoro narodo kova džala ine palo leste hem phenđa: “Vačerava tumenđe, na arakhljum nijekhe ano Izrael te ovel le esavki vera.”

<sup>10</sup> I kad okola kola inele bičhalde irinde pe čhere, arakhle e sluga saste.

*O Isus vazdela taro mule e udovicakere čhave*

<sup>11</sup> Na but palo adava, o Isus dželo ki diz savi vičini pe Nain. Oleja džele lesere učenicu hem but narodo.

<sup>12</sup> A kad alo paše uzalo udar e dizjakoro, reslja e dizutnen sar legarena e mule čhave, kova inele jekhoru pe dajaće koja inele udovica. But dizutne džana ine e dajaja te parunen e čhave.

<sup>13</sup> I kad dikhlja la o Gospod, pelo lese žal olaće hem phenđa laće: "Ma rov!"

<sup>14</sup> I alo paše hem dolinđa pe upro nosilja, i tegani okola so akharde terdine.

A o Isus phenđa: "Terneja, tuće vačerava, ušti!"

<sup>15</sup> I o mulo beštino hem lelja te vaćeri, i o Isus dinđa le lesere dajaće.

<sup>16</sup> Tegani sare darandile hem slavinde e Devle vaćerindoj: "Baro proroko iklilo maškar amende!" hem: "O Devel alo te pomožini ple narodose!"

<sup>17</sup> I adava šundilo ki sa i phuv e jevrejngiri hem ko sa o pašutne thana.

*O Isus vaćeri dai čaće o Jovan proroko (Mt 11,2-19)*

<sup>18</sup> I sa adava e Jovanese e Krstiteljese vaćerde lesere učenicu. Tegani o Jovan vičinda kora peste nesave dujen ple učenikonendar

<sup>19</sup> hem bičhalđa len koro Gospod Isus vaćerindoj: "Tu li injan adava kova valjani te avel ili te adžićera avere?"

<sup>20</sup> I adala manuša ale koro Isus hem phende: "O Jovan o Krstitelj bičhalđa amen kora tute vaćerindoj: 'Tu li injan adava kova valjani te avel ili te adžićera avere?'"

<sup>21</sup> Baš tegani o Isus sasljarda buten oto nambormipa, oto pharipa hem oto bišukar duhija, hem bute kororende dinda dikhiba.

<sup>22</sup> Tegani o Isus phenđa e Jovanesere učenikonende: "Džan hem vaćeren e Jovanese so dikhljen hem so šunden: o korore dikhena, o bange phirena, o gubavci čistinena pe, o kašuke šunena, o mule uštena, e čororende vaćeri pe o Šukar lafi.

<sup>23</sup> I bahtaloi okova kova na našali pli vera ana mande."

<sup>24</sup> Kad e Jovanesere manuša džele, o Isus lelja te vaćeri e narodose e Jovanestar: "So ikliljen ki pustinja te dikhen? I trska sava phudela i barval?"

<sup>25</sup> Ili so ikliljen te dikhen? E manuše ano barvale šeja urjavde? Na! Okola ano skupa šeja hem so živinena ano luksuz, eće tane ano palate.

<sup>26</sup> Ili so ikliljen te dikhen? E proroko? Oja, vaćerava tumende, ovi po više oto proroko!

<sup>27</sup> Ovi okova kastar pisime ano Sveto lil:

'Aće, bičhalava mle glasniko angla tute, kova ka pripremini će o drom.'

<sup>28</sup> Vaćerava tumende: maškar okolende kolai bijande e đuvljendar nijekh nane po baro e Jovanestar, a o najtikoro e Devlese ano carstvo po baroi olestar."

<sup>29</sup> I sa o manuša hem o carinici kola šunde adava, pendžarde dai e Devlesoro sikaviba čačikano, adaleja so krstinde pe e Jovanesere krstibnaja.

<sup>30</sup> A o fariseja hem o učitelja e Zakonestar odbacinde o plan e Devlesoro pumende. Oni adala so na mangle o Jovan te krstini len.

<sup>31</sup> O Isus phenđa: "Kasar akana te uporedinav e manušen oti akaja generacija? Kasei slična?"

<sup>32</sup> Sličnai e čhavorende kola bešena ko trg hem vaćerena jekh averese:

'Bašaldam tumende veselo,  
a na čhelden!  
Đilabdam tužno,  
a na runden!'

<sup>33</sup> Adahar, kad alo o Jovan o Krstitelj, ni halja maro ni pilja mol, a phenena: 'O demoni ano leste!'

<sup>34</sup> A kad aljum me, o Čhavo e manušesoro, hava hem pijava, a phenena: 'Eće manuš halano hem mato, amal e carinikonengoro hem e avere grešnikonengoro!'

<sup>35</sup> Ali i mudrost e Devlesiri dokažini pe sa lakere čhavendar."



*I grešnica pomazini e Isuse  
(Mt 26,6-13; Mk 14,3-9; Jn 12,1-8)*

<sup>36</sup> Nesavo farisej palo anav Simon vičinda e Isuse te avel te hal koro leste. Ov đerdinda e farisejese ko čher hem čhivđa pe uzalo astali.

<sup>37</sup> I eče, adari ali i đuvli kolaće džanda pe dai grešnica ani diz, adalese so šunda da o Isus inele uzalo astali e farisejese ko čher, i anda miris ko čaro savo inele čerdo oto šužo bar.

<sup>38</sup> I terdindoj palo lesere pre, runđa hem lelja te sampačeri lesere pre ple asvencar hem koslja len ple balencar. I tegani čumudinda lesere pre hem mahlja len miriseja.

<sup>39</sup> Kad adava dikhlja o farisej kova vičinda le, phenđa ana peste: "Tei akava manuš proroko, ka džanel ine koi hem savi akaja đuvli koja pipini le - dai grešnica."

<sup>40</sup> A o Isus phenđa lese: "Simone, isi man nešto te vačerav će."

A ov phenđa: "Učitelju, vačer!"

<sup>41</sup> I o Isus phenđa: "Duj džene inele dužnici nesave manušese kova dela pare ko zajam. Jekh dugujini lese panšel e rimljanengere denarija, a o dujto pinda.

<sup>42</sup> Adalese so na ine len te irinen, ov oprostinda o dugo sodujenđe. Kova, onda, olendar više ka volini le?"

<sup>43</sup> O Simon phenđa: "Mislinava da okova kase oprostinda više."

Tegani ov phenđa lese: "Oja, šukar phenđan."

<sup>44</sup> Irinda pe nakori đuvli, i phenđa e Simonese: "Dikheja li akala đuvlja? Đerdindum tuće ko čher, pani mle prende na andan, a oj sampačerđa mle pre ple asvencar hem koslja len ple balencar.

<sup>45</sup> Na pozdravindan man čumudipnaja, a oj, sar đerdindum na ačhavđa te čumudini mle pre.

<sup>46</sup> Na mahljan mlo šero uljeja, a oj mahlja mle pre miriseja.

<sup>47</sup> Adalese phenava će: But mangipe mothovđa, adalese soi laće oprostime but grehija. A hari mangipe mothoj okova kolesei oprostime hari grehija."

<sup>48</sup> A olaće phenđa: "Oprostimei će te grehija."

<sup>49</sup> A o manuša kola inele uzalo astali lelje ana peste te vačeren: "Kovai akava so šaj hem o grehija te oprostini?"

<sup>50</sup> Tegani o Isus phenđa e đuvljaće: "Ti vera spasinda tut! Dža ano mir!"

## 8

*O đuvlja kola džana ine palo Isus*

<sup>1</sup> Palo adava, o Isus lelja te džal ko dizja hem ko gava vačerindoj o šukar lafi oto carstvo e Devlesoro. Oleja dzele hem o dešu duj apostolja

<sup>2</sup> hem nesave đuvlja kola inele saslarde oto bišukar duhija hem oto nambormipa: i Marija vičimi Magdalena, kolatar ikalđa efta demonen,

<sup>3</sup> i Jovana, i romni e Irodesere up-ravnikosiri e Huzesiri, i Suzana hem but avera. Adala đuvlja pumare parencar kandle e Isuse hem lesere učenikonen.

*O Isus vačeri i priča oto sejači  
(Mt 13,1-9; Mk 4,1-9)*

<sup>4</sup> Kad čedinda pe uzalo Isus baro narodo taro but dizja, ov vačerđa lende jekh priča:

<sup>5</sup> "Iklilo o sejači te sejini. I sar frdela ine o seme, nesave zrnja pele ko drom, inele gazime hem o čiriklja sa hale len.

<sup>6</sup> Nesave pele ko than kote inele hari phuv upro bara, i kad barile, šučile adalese so na ine len pani.

<sup>7</sup> I nesave pele maškaro kare, o kare barile olencar hem tašavde len.

<sup>8</sup> I nesave pele ki šukar phuv, barile hem ande bijandipe šel puti više."

Kad vačerđa adava, vičinda: "Kas isi kana, nek šunel!"

*Sostar vačeri i priča oto sejači  
(Mt 13,10-23; Mk 4,10-20)*

<sup>9</sup> Tegani lesere učenici pučle le so manglja te vačeri adala pričaja.

<sup>10</sup> A ov phenđa: "Tumendei dindo te džanen o tajne oto carstvo e Devlesoro, a averenđe vačerava ano priče, sar te šaj:

'anglo jača te na dikhen  
hem anglo kana te na haljoven.'

11 A akava i priča vaćeri: O semei o lafi e Devlesoro.

12 Nesavei manuša sar o drom ko savo pele o zrnja. Kad šunena o Lafi, avela o beng hem lela le lengere vilendar, sar te na poverujinen hem te na oven spasime.

13 A nesavei sar o than e barencar ko savo pele o zrnja. Kad šunena o Lafi, odmah lena le radosno, ali nane len koreno. On nesavo vreme verujinena, ali kad avela o iskušenje otperena.

14 A nesavei sar o than maškaro kare ko savo pele o zrnja. Adalai okola kola šunena o Lafi, ali živinena ano brige, ano barvalipe hem ano zadovoljstvija e dživdipnasere, i ovena tasavde hem na anena šukar plod.

15 A nesavei sar i šukar phuv ki savi sejime o zrnja. Adalai okola kola e šukare hem e bimelale vileja šunena o Lafi hem ićerena le sa đikote na anena šukar plod."

*O Isus vaćeri i priča oti svetiljka  
(Mk 4,21-25)*

16 "Niko na tharela i svetiljka te učhari la čareja ili te čhivel la talo than e pašljojbnasoro, nego čhivela la ko than zaki svetiljka te šaj dikhen o svetlost okola kola đerdinena.

17 Adalese so, sa soi garavdo, ka dičhol; sa soi tajno, ka šundol.

18 Adalese pazinen sar šunena. Adalese so, kas isi, ka del pe lese pana, a kas nane, ka lel pe lestar hem adava so mislini da isi le."

*E Isusesiri čačikani porodica  
(Mt 12,46-50; Mk 3,31-35)*

19 A e Isusesiri daj hem lesere phralja avena ine nakoro leste, ali oto but narodo našti ine te aven đi oleste.

20 A neko phenda lese: "Ti daj hem te phralja terđona avri hem mangena te dikhen tut."

21 A o Isus phenda: "Akalai mli daj hem mle phralja - kola šunena hem ćerena o lafi e Devlesoro."

*E Isuse šunena hem i barval hem o panja  
(Mt 8,23-27; Mk 4,35-41)*

22 I jekh dive o Isus phenda ple ućenikonende: "Te nakha ki aver strana oto jezero!"

I đerdinde ano čamco hem pođinde.

23 A sar plovinena ine, o Isus zasuča. I muklja pe jekh zorali barval upro jezero. O čamco lelja te pherđol pani i arakhle pe ani opasnost.

24 I o učenici ale uzalo Isus hem džangavde le vaćerindoj: "Gospodarona, Gospodarona, meraja!"

I o Isus uštino, naredinđa e barvaljaće hem e talasende te ačhon, i ačhile hem ulo mir.

25 Tegani pučlja e ućenikonen: "Kaj tumari vera?"

A on darandile hem začudime pučle jekh avere: "Kova šaj te ovel akava so naredini e barvaljende hem e panjese, a on šunena le?"

*O Isus ispuđini e demonen e manušestar*

*(Mt 8,28-34; Mk 5,1-20)*

26 I resle ko krajo e gerasakoro savoi prekalo e Galilejakoro jezero.

27 A kad o Isus iklilo ki phuv, reslja le nesavo manuš tari diz kova inele opsednutime demonencar. Sa edobor vreme inele nango hem na beštino ano čher, nego maškaro grobija.

28 I kad dikhlja e Isuse, vrištinda, pelo anglo leste hem vićinda oto sa o glaso: "So mangeja mandar, Isuse, Čhaveja e Najbare Devlesereja? Molinava tut, ma mućin man!"

29 (Adalese so o Isus već naredinđa e melale duhose te ikljol adale manušestar. Angleder, đi hem kad o stražarija pazinena le ine hem phandena le ko lancija hem ko okovija, o manuš phagela len ine hem o demoni legari le ine ko čuće thana.)

30 A o Isus pučlja le: "Sar to anav?"

I ov phenda: "Legija", adalese so but demonja đerdinde ano leste.

31 I zorale molinde le te na naredini lenđe te džan ki Beskrajno rupa.

32 A adari ko brego inele krdo oto bale save hana ine, i o demonja molinde e Isuse te mukel lenđe te đerdinen ano bale. I ov muklja lenđe.

33 Tegani o demonja iklindoj e manušestar, đerdinde ano bale. I o bale

prastandile taro brego ano jezero hem taslile.

<sup>34</sup> I kad okola so arakhena ine e balen dikhle so ulo, našle hem vačerde adalestar e manušenđe ani diz hem ano gava.

<sup>35</sup> Tegani o manuša ale te dikhen so ulo. Ale koro Isus hem arakhle e manuše, kolestar iklile o demonja, sar urjavdo hem saste gođaja bešela uzalo e Isusesere pre, i darandile.

<sup>36</sup> A okola so dikhle adava so ulo, vačerde averenđe sar o Isus sasljarda e opsednutime manuše.

<sup>37</sup> I sa o narodo oto krajo e gerasakoro zamolinde e Isuse te džal olendar adalese so uklinda len bari dar. Tegani o Isus đerdinda ano čamco te irini pe palal.

<sup>38</sup> A o manuš, kolestar o Isus ikalđa e demonen, molinda e Isuse te džal oleja, ali o Isus bičhalđa le vačerindoj:

<sup>39</sup> "Irin tut te čhereste hem vačer sa so čerđa će o Devel."

I o manuš dželo maškari sa i diz hem vačerđa so čerđa lese o Isus.

*O Isus sasljari e namborma đuvlja hem vazdela taro mule e čhajorja  
(Mt 9,18-26; Mk 5,21-43)*

<sup>40</sup> A kad o Isus irinda pe ki aver strana oto jezero, but manuša inele radosna so dikhe le so avela, adalese so sare adžicerena le ine.

<sup>41</sup> I dikh, alo o manuš palo anav Jair, kova inele vođa ani sinagoga. I perindoj anglo pre e Isusesere, phenda: "Molina va tut, ava maje ano čer."

<sup>42</sup> Adalese so e Jairesiri jekhor i čhaj, kola ine dešu duj berš, inele anglo meriba.

I sar o Isus džala ine palo Jair, o narodo gurini pe ano leste.

<sup>43</sup> A maškaro narodo inele jekh đuvli kolatar dešu duj berš thavdinda rat. Oj sa plo barvalipe dinda ko doktorija, ali nijekh našti ine te sasljari la.

<sup>44</sup> Nakhini oto palal e Isusesere hem dolinda pe upro lesere fostanesoro krajo hem otojekhvar ačhilo te thavdel latar o rat.

<sup>45</sup> I o Isus pučlja: "Ko dolinda pe upra mande?"

A kad svako olendar phende: "Na injum me", o Petar phenda: "Gospodarona,

sar te džana kad but džene čedinde pe hem gurinena pe uzala tute."

<sup>46</sup> A o Isus phenda: "Neko namerno dolinda pe upra mande. Osetindum sar ikljola mandar o zoralipe."

<sup>47</sup> A i đuvli dikhlja so našti te garaj pe, tresindoj oti dar ali hem peli mujeja di phuv anglo leste hem vačerđa anglo sa o manuša sose dolinda pe upro leste hem sar otojekhvar inele sasljardi.

<sup>48</sup> A o Isus phenda laće: "Mli čhaj, ti vera sasljarda tut. Dža ano mir!"

<sup>49</sup> Sar o Isus pana vačeri ine adava, nesavo manuš taro čer e Jairesoro, e sinagogakere vođasoro, alo hem phenda: "Jaire, ti čhaj muli. Ma više mučin e učitelje."

<sup>50</sup> A o Isus šunđa adava hem phenda e Jairese: "Ma dara! Samo verujin hem oj ka ovel sasljardi!"

<sup>51</sup> I kad reslo ko čer, o Isus na muklja nikase te đerdini oleja, sem e Petrese, e Jovanese, e Jakovese hem e čhajorjakere dadese hem e dajaće.

<sup>52</sup> A sare, kola već inele ano čer, runde hem tugujinde palo late.

A o Isus phenda: "Ma roven! Adalese so oj na muli, nego sovela."

<sup>53</sup> I on asandile lese adalese so džande so muli.

<sup>54</sup> A o Isus dželo hem dolinda la oto vas hem vičinda: "Čhajorije, ušti!"

<sup>55</sup> I lakoro duho irinda pe ano late, i otojekhvar uštini, a o Isus naredinda te den la nešto te hal.

<sup>56</sup> I lakoro dad hem lakiri daj inele but začudime, a o Isus naredinda lende te na vačeren nikase so ulo.

## 9

*O Isus bičhali e apostolen te vačeren o evanđelje hem te sasljaren  
(Mt 10,5-15; Mk 6,7-13)*

<sup>1</sup> A o Isus vičinda e dešu duje apostolen hem dinda len zoralipe hem autoritet upro sa o demonja hem te sasljaren o nambormipa.

<sup>2</sup> I bičhalđa len te propovedinen oto carstvo e Devlesoro hem te sasljaren e nambormen.

<sup>3</sup> I phenđa lende: “Ma legaren tumencar ništa ko drom: ni štapi, ni torba dromese, ni maro, ni pare, hem te na ovel tumen aver gad.

<sup>4</sup> Sa đikote ačhove na ki nesavi diz, i đikote na džana adathar, bešen ano jekh cher.

<sup>5</sup> Te na priminde tumen nesave dizutne, ikljoven tari adaja diz hem tresinen i prašina tumare preNDAR sar znako zako zoralo odbiba.”

<sup>6</sup> I on dže taro gav ko gav, vačerindoj o šukar lafi hem saslarindoj e nambor-men ko sa o thana.

*O Irod zbunime  
(Mt 14,1-12; Mk 6,14-29)*

<sup>7</sup> A o Irod, o vladari e Galilejakoro, šunđa sa so ulo i inele zbunime adalese so nesave vačerde da o Jovan o Krstitelj uštino taro mule.

<sup>8</sup> A avera vačerde da o proroko o Ilija mothovđa pe ki phuv, a nesave avera vačerde da taro mule uštino nesavo proroko taro purano vreme.

<sup>9</sup> A o Irod phenđa: “Me čhindum e Jovanesoro šero. A kovai onda akava kastar sa adava šunava?”

I manglja te dikhel e Isuse.

*O Isus parvari više oto pandž hiljade manušen  
(Mt 14,13-21; Mk 6,30-44; Jn 6,1-14)*

<sup>10</sup> I kad o apostolja irinde pe koro Isus, vačerde lese sa so čerde. I o Isus legarđa len peja hem cidinđa pe olencar nakori diz vičime Vitsaida te šaj oven korkore.

<sup>11</sup> Ali o narodo šunđa adava i dželo palo lende. A o Isus dodžačerđa len šukar, vačerđa lende oto carstvo e Devlesoro hem saslarđa okolen kase adava valjanđa.

<sup>12</sup> A kad lelja te perel i rat, o dešu duj apostolja nakhle đi o Isus hem phende lese: “Te muke ine e manušen te šaj džan ko pašutne gava hem thana kote šaj te arakhen nešto hajbnase hem than sojbnase. Adalese so injam akate ko čučo than kaj nane ništa.”

<sup>13</sup> A o Isus phenđa lende: “Den len tumen nešto hajbnase!”

A on phende: “Ali isi amen samo pandž mare hem duj mače. Mangeja amendar

te dža te čina hajbnase zako sa akava narodo?”

<sup>14</sup> Adari inele đi ko pandž hiljade murša. Tegani o Isus phenđa ple učenikonende:

“Čhiven len te bešen ko kupe po pinda.”

<sup>15</sup> I on čerde adahar, hem čivde sarijen te bešen.

<sup>16</sup> O Isus lelja o pandž mare hem e duje mačen, dikhlja nakoro nebo, zahvalinđa e Devlese zako hajba, phaglja len hem dinđa ko učenici te podelinen len e manušen.

<sup>17</sup> I sare hale đikote na čalile. A palo adava, dešu duj korpe čedinde pe okolestar so ačhilo oto hajba.

*O Petar phenela dai o Isus o Hrist  
(Mt 16,13-19; Mk 8,27-29)*

<sup>18</sup> Jekhvar kad o Isus korkoro molinđa pe, oleja inele lesere učenici. Ov pučlja len: “So phenena o manuša, ko injum me?”

<sup>19</sup> A on phende: “Nesave manuša phenena da tu injan o Jovan o Krstitelj, a avera phenena da tu injan o proroko o Ilija, a nesave avera phenena da tu injan jekh oto avera proroci taro purano vreme kova uštino taro mule.”

<sup>20</sup> Tegani o Isus pučlja len: “A so tumen phenena, ko injum me?”

O Petar phenđa: “Tu injan o Hrist, kole o Devel bičhalđa!”

*O Isus vačeri ple meribnastar  
(Mt 16,21-23; Mk 8,31-33)*

<sup>21</sup> A o Isus zorale naredinđa e učenikonende te na vačeren nikase dai ov o Hrist.

<sup>22</sup> I phenđa: “Me, o Čhavo e manušesoro, valjani but te patinav. O starešine, o šerutne sveštenici hem o učitelja e Zakonestar naka prihvatinen man. Ka ovav mudardo, ali o trito dive ka uštav taro mule.”

*Sar te ovel pe e Isusesoro učeniko  
(Mt 16,24-28; Mk 8,34-9,1)*

<sup>23</sup> I o Isus phenđa sarijenđe: “Ko mangela te džal pala mande, mora te ačaj pe ple dživdipnastar hem te lel plo krsto taro dive ko dive hem te phirel pala mande.

24 Adalese so, ko mangela te spasini plo dživdipe, ka našali le, a ko našali plo dživdipe zbog mande, ka spasini le.

25 So vredini e manušese hem sa i phuv te ovel olesiri, a našali ili upropastini korkoro pes?

26 Adalese ko lađala mandar hem mle lafendar, hem me, o Čavo e manušesoro, ka lađav olear kad ka avav ani mli slava hem ani slava e Dadesiri hem e svetone anđelengiri.

27 A čače vačerava tumenđe, isi nesave akate maškara tumende kola naka meren đikote na dikhena o carstvo e Devlesoro.”

*E Isusesiri slava mothovela pe ki gora anglo trin učenici*

*(Mt 17,1-8; Mk 9,2-8)*

28 Đi sar ofto dive palo adava so phenđa lenđe, o Isus lelja peja e Petre, e Jovane hem e Jakove i dželo ki gora te molini pe.

29 I sar molini pe ine, lesoro muj ulo averčhane hem lesere šeja ule but parne hem sjajna.

30 I dikh, nekotar iklile duj manuša hem lelje te vačeren oleja. Adala inele o Mojsije hem o Ilija.

31 On mothovde pe ano baro sjaj hem vačerde oleja e meribnastar savo adžičeri le ano Jerusalim.

32 A o Petar hem okola so inele oleja, zasuče. Kad uštine, dikhle e Isuse ano baro sjaj hem e duje manušen sar terđona oleja.

33 I kad lelje o Mojsije hem o Ilija te ciden pe e Isusestar, o Petar phenđa e Isuses: “Gospodarona, šukari amende so injam akate. Te čera trin šatorja: jekh tuće, jekh e Mojsijase hem jekh e Ilijase.” Na džanđa so vačeri.

34 Sar vačeri ine adava, iklilo jekh oblako savo učarđa len. A on, kad učarđa len o oblako, darandile.

35 I šundilo glas taro oblako savo vačerđa: “Akavai mlo Čavo, kole birinđum! Ole šunen!”

36 I palo adava so šundilo o glas, o učenici dikhle samo e Isuse korkore. I tra inde, hem tegani pana nikase na vačerde adalestar so dikhle.

*O Isus ikali e bišukare duho e čhavorestar*

*(Mt 17,14-18; Mk 9,14-27)*

37 Tejsato dive, kad o Isus hem o trin učenici huljile tari gora, baro narodo alo te dikhel e Isuse.

38 I dikh, nesavo manuš taro narodo lelja te vičini: “Učitelju, molinava tut te pomožine mle čhavese, adalese soi maje jekhoru!”

39 O bišukar duho but puti prelela le hem otojekhvar vrištini; frdela le ano grčevija hem ikljola lestar pena taro muj; uništini le hem jedva ačaj le.

40 I molinđum te učenikonen te ispudinen e bišukare duho mle čhavestar, ali on našti ine te čeren adava.”

41 A o Isus phenđa: “O, biverakiri hem rumimi generacijo! Pana kobor valjani te ovav tumencar hem te trpinav tumen? Ana te čhave akari!”

42 I sar o čavoro avela ine đi o Isus, o demoni frdinđa le ki phuv ano grčevija. A o Isus naredinđa e bišukare duhose te cidel pe e čhavorestar, sasljarđa e čhavore hem dinđa le palal ko dad.

43 Tegani sare inele začudime so dikhle e Devlesoro baro zoralipe.

*O Isus dujto puti vačeri ple meribnastar*

*(Mt 17,22-23; Mk 9,30-32)*

Sar sare čudinena pe ine zako adava so čerđa o Isus, ov phenđa ple učenikonenđe:

44 “Šunen šukar akala lafija: Me, o Čavo e manušesoro, valjani te ovav predime ano vasta e manušengere.”

45 Ali o učenici na halile so o Isus manglja te vačeri adaleja. Adava inele olendar garavdo sar te na haljo ven le, a darandile te pučen le so adaleja manglja te vačeri lenđe.

*O poniznai najbare ano carstvo e Devlesoro*

*(Mt 18,1-5; Mk 9,33-37)*

46 A o učenici lelje maškara pumende te raspravinen kovai olendar najbaro.

47 A o Isus džanđa soi lenđe ki godi, lelja jekhe čhavore, čhivđa le uzala peste,

48 i phenđa lenđe: “Svako kova primini akale čhavore zbog maje, man primini. A svako kova man primini, primini e Devle kova bičhalđa man. Adalese so, ko maškara tumende pes dikhela sar najtikore, ovi najbaro.”

*Kova nane protiv tumende, ovi tumencar*  
(Mk 9,38–40)

<sup>49</sup> A o Jovan phenđa e Isusese: “Gospodarona, dikhljam nesave manuše sar ano to anav ispuđini e demonen e manušendar. Amen na mukljam lese te čerel adava, adalese so na džala amencar pala tute.”

<sup>50</sup> A o Isus phenđa lese: “Muken le te čerel adava, adalese so okova kova nane protiv tumende, ovi tumencar!”

*O Isus na mangela te uništini e Samarijanconen*

<sup>51</sup> A kad inele paše o dive e Isusesere te ovel vazdime ko nebo, ov zorale odlučinđa te džal ko Jerusolim.

<sup>52</sup> I bičhalđa nesave glasnikonen angla peste. I on dže le hem đerdinde ko nesavo gav ani regija Samarija te pripreminen le e Isusese.

<sup>53</sup> Ali o gavutne na mangle e Isuse adalese so džande da džala ko Jerusolim.

<sup>54</sup> A dikhindoj adava o učenci o Jakov hem o Jovan, pučle e Isuse: “Gospode, mangeja li te phena te huljel taro nebo i jag hem sa te tharel len?”

<sup>55</sup> A o Isus irinđa pe hem ukorinđa len.

<sup>56</sup> I ov hem lesere učenci dže le ko aver gav.

*Nane lokho te ovel pe e Isusesoro učeniko*  
(Mt 8,19–22)

<sup>57</sup> I sar o učenci hem o Isus džana ine dromeja, nesavo manuš alo hem phenđa e Isusese: “Ka džav tuja kaj god tu džaja.”

<sup>58</sup> A o Isus phenđa lese: “E lisicen isi jazbine hem e čirikljen gnezdija, a man, e Čhave e manušesere nane kaj te pašljarav mlo šero.”

<sup>59</sup> A avere manušese phenđa: “Phir pala mande!”

A ov phenđa: “Aš najangle, Gospode, te parunav mle dade, i ka džav pala tute.”

<sup>60</sup> Tegani o Isus phenđa lese: “Muk o mule te parunen ple mulen, a tu dža vačer oto carstvo e Devlesoro.”

<sup>61</sup> A aver manuš phenđa: “Ka phirav pala tute, Gospode, ali aš najangle te džav te pozdravinav man mle čerutnencar.”

<sup>62</sup> A o Isus phenđa lese: “Nijekh kova dolela pe upro plugo te orini i onda dikhela napalal, nane korisno zako carstvo e Devlesoro.”

## 10

*O Isus bičhali e eftavardešu duje učenikonen*

<sup>1</sup> Palo adava, o Gospod Isus birinđa avere eftavardešu duje učenikonen hem bičhalđa len duj po duj angla peste ko sa o dizja hem o thana ko save ov manglja te džal.

<sup>2</sup> Angleder so te džan, o Isus phenđa lenđe: “I žetvai bari, a hari bućarne te čeden. Adalese, molinen e gospodare oti žetva te bičhali e bućarnen ki žetva pli.

<sup>3</sup> Džan! Ače, bičhalava tumen sar bakroren maškaro ruva.

<sup>4</sup> Ma legaren tumencar kesa e parencar, ni torba dromese, ni buđeri obuća. I ma našalen tumaro vreme ađahar so ka terđoven te pozdravinen nekasar odrumal.

<sup>5</sup> I kad đerdinena ko nesavo čher, prvo vaćeren: ‘Mir akale čhereste!’

<sup>6</sup> Te adari bešela o manuš kova mangela mir, tegani o mir, savese tumen molinena, ka ačhol oleja; a te na manglja mir, tumaro mir ka irini pe tumenđe.

<sup>7</sup> Kad avena ko nesavo čher, ma palo adava nakhen ko avera čhera. Ačhoven ko jekh than, han hem pijen adava so o čherutne ikalena angla tumende, adalese so o bućarno zaslužini pli plata.

<sup>8</sup> I ki savi diz đerdinena, a o dizutne priminena tumen, han okova so ikalena angla tumende.

<sup>9</sup> Sasljaren e nambormen adari hem vaćeren sarijenđe: ‘Alo tumenđe paše o carstvo e Devlesoro!’

<sup>10</sup> A ki savi diz đerdinena, a o dizutne na priminena tumen, iklindoj ko glavna droma e dizjakere, vaćeren:

<sup>11</sup> ‘Hem i prašina tumara dizjakiri, savi dolinđa pe ko amare pre, amen kosaja la sar znako zako zoralo odbiba. Ali te džanen da o carstvo e Devlesoro alo paše!’

<sup>12</sup> Vaćerava tumenđe da ko dive oto baro sudo, po lokhe ka ovel e manušenđe tari Sodoma negoli e manušenđe tari adaja diz.”

*O Isus ukorini e dizjen save na pokajinde pe*

*(Mt 11,20-24)*

<sup>13</sup> “Jao tumende, manušalen taro Hozazin! Jao tumende, manušalen tari Vitsaida! Te oven ine čudesija maškaro manuša taro Tir hem taro Sidon save ule maškara tumende, pana angleder ka bešen ine ano šeja oto kanaj hem ka čhoren pepeo upro pumare šere sar te mothoven da kajinena pe.

<sup>14</sup> Ali e manušende taro Tir hem taro Sidon ka ovel po lokhe ko Sudo negoli tumende.

<sup>15</sup> A tumen, manušalen taro Kafarnaum, na li di o nebo ka vazden tumen? Di o than e mulengoro isi te peren.

<sup>16</sup> Tegani phenda e učenikonende: Ko šunela tumen, man šunela, a ko odbini tumen, man odbini. A ko odbini man, odbini e Devle kova bičhalda man.”

*O eftavardešu duj učenici irinena pe koro Isus*

<sup>17</sup> Kad o eftavardešu duj učenici irinde pe oto drom radosna, phende e Isuse: “Gospode, hem o demonja pokorinena pe amende ano to anav!”

<sup>18</sup> A o Isus ko adava phenda lende: “Dikhljum e Sotone sar perela taro nebo sar munja.

<sup>19</sup> Eče, dindum tumen vlast te gazinen upro sapa hem o škorpije hem upro sa o zoralipe e neprijateljeseo hem ništa naka ovel tumende.

<sup>20</sup> Ali ma edobor radujinen tumen zako adava so o bišukar duhija pokorinena pe tumende, nego više radujinen tumen adalese soi tumare anava zapisime ano nebo.”

*O Isus hvalini e Dade*

*(Mt 11,25-27; 13,16-17)*

<sup>21</sup> I tegani o Isus radujinda pe ano Sveto Duho hem phenda: “Hvalinava tut, Dade, Gospode e nebosoro hem e phuvjakoro, so garavdan akava okolendar kola pes dikhena sar mudronen hem džanden, a mothovdan okolende kolai sar čhavore. Oja, Dade, džanav da čerđan adava adalese so ađahar mangljan.

<sup>22</sup> Mlo Dad sa muklja maje ko vasta. Niko na džanel e Čhave, sem o Dad; hem

niko na džanel e Dade, sem o Čhavo hem okola kolende o Čhavo mangela te mothoj le.”

<sup>23</sup> Tegani irinda pe nakoro učenici hem samo olende phenda: “Blago e jačhende save dikhena adava so tumen dikhena!

<sup>24</sup> Vačerava tumende da but proroci hem carija mangle te dikhen akava so tumen dikhena, ali na dikhle; hem mangle te šunen okova so tumen šunena, ali na šunde!”

*I priča oto šukar Samarijanco*

<sup>25</sup> I dih, jekh dive sar o Isus sikaj ine, nesavo učitelj e Zakonestar uštino te pučel le nešto sar te iskušini le, i pučlja: “Učitelju, so valjani te čerav te dobinav o večno dživdipe?”

<sup>26</sup> A o Isus phenda lese: “Soi pisime ano e Mojsijasoro zakoni? So čitineja adari?”

<sup>27</sup> I ov phenda e Isuse:

“Volin e Gospode te Devle sa te vileja,

sa te dušaja, sa te zoralipnaja hem sa te gođaja;

hem volin te pašutne sar korkore tut.”

<sup>28</sup> Tegani o Isus phenda lese: “Šukar phendan. Čer ađahar hem ka živine.”

<sup>29</sup> Ali o učitelj e Zakonestar manglja te opravdini pe i pučlja e Isuse: “A koi mlo pašutno?”

<sup>30</sup> A ko adava, o Isus phenda lese akaja priča: “Nesave manuše, sar huljela ine tari diz Jerusalim ki diz Jerihon, dolinde o čora. On lelje lestar sa, di o šeja. Zorale marde le, i džele, a o manuš pašlilo ko drom hem na džanda pese.

<sup>31</sup> Na nakhlo but, i nekotar adale dromeja sar huljela ine nesavo svešteniko, dikhlja adale manuše hem nakhino oti aver strana.

<sup>32</sup> Ađahar da nesavo levit: alo di adava than kote o manuš pašljola, dikhlja le i nakhino oti aver strana adale dromesiri.

<sup>33</sup> A inele nesavo Samarijanco savo džala ine adale dromeja. Kad reslja di ko than kote o manuš pašljola, dikhlja le, i pelo lese žal olese.

<sup>34</sup> Tegani o Samarijanco alo di o manuš, čhorda ulje hem mol upro lesere rane te kosel len hem pačarda len. I čhivda le

upro plo her hem legarda le ki gostionica, i adari brininda pe olestar.

<sup>35</sup> Tejsato dive o Samarijanco ikalđa duj srebrna kovanice hem dinda ko manuš kasiri inele i gostionica hem phenda lese: 'Brinin tut akale manušestar, i sa so ka trošine buderi, ka irinav će kad ka irinav oto drom.' "

<sup>36</sup> Tegani o Isus pučlja e učitelje e Zakonestar: "So tu pheneja? Kova akale trinendar mothovđa pe sar pašutno okolese kole dolinde o čora?"

<sup>37</sup> A ov phenda: "Okova kova mothovđa lese milosrđe."

Tegani o Isus phenda lese: "Oja, hem tu dža hem ćer ađahar!"

### *O Isus kori Marta hem i Marija*

<sup>38</sup> I sar o Isus hem lesere učenici džana ine dromeja nakoro Jerusolim, đerdinde ko nesavo gav. Adari živinda nesavi đuvli palo anav Marta. Oj priminda len kora peste ko čer.

<sup>39</sup> Ola inele phen palo anav Marija, koja beštini uzalo e Gospodesere e Isusesere pre hem šunđa lesoro lafi.

<sup>40</sup> A i Marta sa ki sig dikhela ine te kandel, i ali uzalo Isus hem pučlja le: "Gospode, tu li na dikheja adava so mli phen muklja man korkora te kandav? Phen laće te pomožini maje."

<sup>41</sup> A o Gospod phenda laće: "Marto, Marto! Briniñeja tut hem uznemirineja tut zako but so,

<sup>42</sup> a samo jekh valjani. I Marija izabirinda okova soi po šukar, i adava naka lel pe latar."

## 11

*O Isus sikaj e učenikonen sar te molinen pe*

*(Mt 6,9-15; 7,7-11)*

<sup>1</sup> I kad jekhvar o Isus završinda e molitvaja, jekh lesere učenikonendar phenda lese: "Gospode, sikav amen te molina sar so o Jovan o Krstitelj sikavđa ple učenikonen."

<sup>2</sup> Tegani o Isus phenda lenđe: "Kad molinena, vaćeren:

'Dade, to sveto anav barjardo te ovel! To carstvo te avel!

<sup>3</sup> De amen avdive o maro savo valjani amende svako dive!

<sup>4</sup> Oprostin amende amare grehija sar so hem amen oprostinaja svakonese kova grešinda premala amende!

Hem cide amen taro iskušenje!' "

<sup>5</sup> Tegani o Isus phenda lenđe: "Zamislinen da ki ekvaš i rat džana koro tumaro amal te phenen lese: 'Amala, te de man trin mare, i ka irinav će.

<sup>6</sup> Mlo amal alo oto drom kora mande, a nane man so te ikalav anglo leste!'

<sup>7</sup> A ov od andral te phenel: 'Ma uznemirin man! O udarai phandle, a mle čhavore već pašlile mancar hem sovena. Našti akana te uštav te dav tut!'

<sup>8</sup> Vaćerava tumenđe: te na uštino te del le adalese soi lesoro amal, ka uštel hem ka del le sa so valjani adalese so lesere amale nane lađ te ovel uporno.

<sup>9</sup> Vaćerava tumenđe: Mangen hem ka del pe tumenđe! Roden hem ka arakhen! Khuven hem ka phravel pe tumenđe!

<sup>10</sup> Adalese so svako kova mangela, primini; hem kova rodela, arakhi; hem kova khuvela, ka ovel lese phravdo.

<sup>11</sup> A kova dad tumendar: kad lesoro čhavo ka rodel lestar ine maće, ka del le sape?

<sup>12</sup> Ili kad ka rodel jaro, ka del le škorpija?

<sup>13</sup> Kad tumen, kola injen bišukar, džanen te den šukar darija tumare čhavende, kobor više tumaro Dad taro nebo ka del e Svetone Duho okolende kola rodona olestar."

*O Isus kandela pe e Devlesere zoralipnaja, a na e bengesere*

*(Mt 12,22-30; Mk 3,20-27)*

<sup>14</sup> I jekh dive o Isus ispuđinda e demone kova ćerela ine jekhe manuše te našti vaćeri. Kad iklilo o demoni, o manuš lelja te vaćeri. I o narodo inele zadivime,

<sup>15</sup> ali nesave olendar vaćerde: "E Veelzevulesere, e demonengere šerutnesere, zoralipnaja ispuđini e demonen!"

<sup>16</sup> A avera iskušinde e Isuse ađahar so rodinde lestar znako taro nebo.

<sup>17</sup> Ali o Isus džanda lengere mislija, i phenda lenđe: "Svako carstvo savoi ana



peste podelime ka properel, hem o čher ano savo nane sloga ka perel.

<sup>18</sup> Tei e Sotonesoro carstvo ana peste podelime, sar onda pana trajini? Akava vačerava adalese so tumen phenena da e Veelzevulesere zoralipnaja ispudinava e demonen.

<sup>19</sup> A te me e Veelzevulesere zoralipnaja ispudinava e demonen, kasere zoralipnaja tumare učenici ispudinena len? Adalese on ka dokažinen tumende da na injen u pravu.

<sup>20</sup> Ali te me e Devlesere zoralipnaja ispudinava e demonen, onda o carstvo e Devlesoro alo maškara tumende.”

<sup>21</sup> O Isus phenđa hem akava: “Kad okova kovai zoralo hem naoružime pazini plo čher, lesoro barvalipei osigurime.

<sup>22</sup> Ali kad avela o po zoralo lestar, ka pobedini le hem ka lel lestar o oružje upro savo inole nada hem ka delini plencar adava so lelja e bizoralestar.

<sup>23</sup> Ko nane mancar, ovi protiv mande. I ko na čedela mancar, ov čhorela.”

*Kad o bišukar duho palem irini pe  
(Mt 12,43–45)*

<sup>24</sup> Tegani o Isus phenđa: “Kad o bišukar duho ikljola taro manuš, džala ko šuke thana rodindoj kote šaj te odmorini. Kad na arakhi le, vačeri: ‘Ka irinav man ko čher kotar ikliljum.’

<sup>25</sup> I irinđa pe hem arakhlja o čher šulavdo hem namestime.

<sup>26</sup> Tegani džala hem lela efa avere duhen po bišukaren pestar hem đerdinena ano adava manuš hem ačhovea adari. I ko kraj adale manšese ovela po bišukar nego angleder.”

*Blagoslovime i o poslušna e Devlese*

<sup>27</sup> I sar o Isus vačeri ine adava, nesavi đuvli oto narodo vičindđa: “Bahtali i đuvli koja akharđa tut ano vođi hem dindđa tut čuči!”

<sup>28</sup> A o Isus phenđa: “Po bahtalei okola so šunena o lafi e Devlesoro hem čerena le!”

*O Isus po baroi e Jonastar hem e Solomonestar  
(Mt 12,38–42; Mk 8,12)*

<sup>29</sup> Sar čedela pe ine po baro narodo, o Isus lelja te vačeri: “Akajai generacija

bišukar. Rodela mandar znako, ali nisavo znako naka del pe laće sem adava so inele e prorokose e Jonase.

<sup>30</sup> Sar so adava so ulo e Jonaja inele znako e manušende kola živinde ki diz Niniva, adahar hem so ka ovel mancar, e Čhaveja e manušesereja, ka ovel znako akala generacijaće.

<sup>31</sup> Ko dive oto baro sudo, i carica koja angleder vladinđa ki južno phuv ka uštel hem ka osudini e manušen oti akaja generacija, adalese so tari durutni phuv ali te šunel e Solomonesiri mudrost, a akatei tumencar neko po baro e Solomonestar, a tumen na mangena te šunen!

<sup>32</sup> Ko dive oto baro sudo, o manuša kola živinde ani purani diz Niniva ka ušten protiv akaja generacija hem ka osudinen la, adalese so on pokajinde pe kad o Jona propovedinđa, a akatei tumencar neko po baro e Jonastar, a tumen pana na pokajinđen tumen!”

*E Isusesoroi sikaviba svetlost e manušende  
(Mt 5,15; 6,22–23)*

<sup>33</sup> “Niko na tharela i svetiljka hem te čhivel la ko garavdo than ili talo čaro, nego čhivela la ko than zaki svetiljka te šaj dikhen o svetlost okola kola đerdinena.

<sup>34</sup> Ti jakhi sar svetiljka te telose. Kadi ti jakh šukar, sai to telo osvetlime. A kadi ti jakh bišukar, hem to teloi ani tomina.

<sup>35</sup> Adalese, pazin da o svetlost so mislineja dai ana tute nane tomina.

<sup>36</sup> Tei sa to telo pherdo oto svetlost, bizo jekh deo oti tomina, tegani sa to dživdipe ka ovel osvetlime sar kad i svetiljka osvetlini tut ple svetloja.”

*O Isus kritikujini e verakere vođen soi pobožna samo od avrijal  
(Mt 23,1–36; Mk 12,38–40; Lk 20,45–47)*

<sup>37</sup> Kad o Isus vačerđa adava, nesavo farisej vičindđa le te hal maro koro leste. I o Isus đerdinđa lese ko čher hem čhivđa pe uzalo astali.

<sup>38</sup> A o farisej dikhindoj adava, čudinđa pe so o Isus, palo adeti, na thovđa ple vasta angleder o hajba.

<sup>39</sup> A o Gospod Isus phenda lese: "Oja, tumen o fariseja kosena i šolja hem o čaro od avrijal, a pherden len tumara pohlepaja hem bišukaripnaja.

<sup>40</sup> Hulavonalen! Nane li o Devel okova kova čerđa e manuše, kova džanel le hem od avrijal hem od andral?

<sup>41</sup> Nego, den e čororende sar milostinja okova so isi tumen andre, hem sa ka ovel tumende čisto.

<sup>42</sup> Ali jao tumende e farisejende so dena e Devlese desetak oto začinja: oti nana, oti ruta hem oto sa o povrće, a ačhavden te čeren averende okova soi pravedno hem te volinen e Devle. Valjani te den o desetak, ali na troman te bistren te čeren adava soi po bitno.

<sup>43</sup> Jao tumende e farisejende so volinena te bešen ko anglune thana ano sinagoge hem so volinena kad o manuša, pherde poštujiba premala tumende, pozdravinena tumen ko trgija.

<sup>44</sup> Jao tumende adalese so injen sar o bioznačime grobija upra savende o manuša phirena, a na džanen."

<sup>45</sup> Tegani nesavo oto učitelja e Zakonestar phenda e Isusese: "Učitelju, tu hem amen vredineja adale lafencar."

<sup>46</sup> A o Isus phenda: "Jao hem tumende, učiteljalen e Zakonestar! Čhivena upro manuša pharipa but phare te akharen adahar so dena len pravilja save naši te iceren, a ni najeja na mangena te mrdinen te pomožinen lenđe te akharen adava pharipe.

<sup>47</sup> Jao tumende, adalese so vazdena spomenici e prorokonende kolen tumare pradada mudarde.

<sup>48</sup> Adaleja mothovena da odobrinena adava so čerde tumare pradada: on mudarde len, a tumen vazdena lenđe spomenici.

<sup>49</sup> Adalese o Devel mudro vačerđa tumendar: 'Ka bičhalav lenđe prorokonen hem apostolen. Nekas olendar ka mudaren, a nekas ka progoninen.'

<sup>50</sup> Akala generacijatar ka rodel pe o rat sa e prorokonengoro savo thavdinda pana taro čeriba e svetosoro,

<sup>51</sup> pana taro rat e Aveljesoro sa di o rat e Zaharijasoro, kova inele mudardo

maškaro žrtveniko hem i svetinja ano Hram. Oja, vačerava tumende, akaja generacija ka ovel osudime zako adava rat so thavdinda!

<sup>52</sup> Jao tumende, učiteljalen e Zakonestar! Adalese so e narodostar garavden o ključo oto džandipe. Korkore na đerdinden, a na mukljen te đerdinen ni okola kola mangle te đerdinen."

<sup>53</sup> I kad o Isus iklilo adathar, o učitelja e Zakonestar hem o fariseja ani bari holi lelje te protivinen pe hem te pučen le but so.

<sup>54</sup> On dikhle te dolen le ko bišukar lafi sar te šaj optužinen le.

## 12

*O Isus vačeri ple učenikonende te na oven dujemujengere*

<sup>1</sup> I kad čedinde pe nekobor hiljade manuša, edobor džene inele da jekh avere gazinde, o Isus prvo lelja te vačeri ple učenikonende: "Arakhen tumen taro kvasco e farisejengoro, te na oven dujemujengere sar soi on.

<sup>2</sup> Sa soi garavdo, ka otkrijini pe; sa soi tajno, ka šundol.

<sup>3</sup> Adalese, sa so vačerden ani tomina, ka šundol ano svetlost; hem so pohari vačerden ko kan ano sobe, ka vačeri pe taro krovija sare te šunen."

*O učenici na valjani te daran, adalese soi dragocena e Devlese*

*(Mt 10,28-31)*

<sup>4</sup> "Ali phenava tumende, amalalen: ma daran okolendar kola šaj te mudaren samo o telo, adalese so više adalestar naka šaj te čeren tumende.

<sup>5</sup> A ka phenav tumende kastar te daran: te daran taro Devel kas palo mudariba isi zoralipe te frdel ano pakao. Oja, vačerava tumende, olestar te daran!

<sup>6</sup> Na biknena pe li pandž čiriklja zako samo duj najtikore kovanice? A palem nijekh olendar nane bisterdi anglo Devel.

<sup>7</sup> A tumendei hem svako bal ko šero džendo. Adalese, ma daran! E Devlese injen po dragocena negoli but čiriklja!"

*O učenci valjani te priznajinen e Isuse anglo manuša*

*(Mt 10,32-33; 12,32; 10,19-20)*

<sup>8</sup> "A vačerava tumende: Svako kova anglo manuša ka priznajini dai mlo, me, o Čavo e manušesoro, anglo anđelja e Devlesere ka priznajinav dai ov mlo.

<sup>9</sup> A te odrekninda pe neko mandar anglo manuša, hem me ka odrekniav man olear anglo anđelja e Devlesere.

<sup>10</sup> I te vačerda neko lafi protiv o Čavo e manušesoro, ka ovel lese oprostime; ali naka ovel oprostime okolese kova hulini upro Sveto Duho.

<sup>11</sup> A kad ka anen tumen anglo sudo ko sinagoge, anglo vladarija hem o vlastija, ma oven zabrinuta sar hem soja te brani-nen tumen, so te vačeren!

<sup>12</sup> Adalese so tegani o Sveto Duho ka sikaj tumen so te vačeren."

*I priča e bigođakere barvale manušestar*

<sup>13</sup> Tegani neko oto narodo phenda e Isuse: "Učitelju, vačer mle phralese te podelini mancar o nasledstvo."

<sup>14</sup> A o Isus phenda lese: "Manušeja, ko čivda man te ovav sudija ili delioco upra tumende?"

<sup>15</sup> Tegani phenda sarijende: "Arakhen tumen hem ciden tumen tari pohlepa. I sa edobor barvalipe te ovel e manuše, lesoro dživdipe na avela oto adava so isi le."

<sup>16</sup> Tegani o Isus phenda lende akaja priča: "Nesave barvale manušesiri phuv bijanda but.

<sup>17</sup> I ov mislinđa pe ana peste: 'So te čerav? Nane man edobor baro than kote te čivav mli žetva.'

<sup>18</sup> I phenda: 'Akava ka čerav! Ka peravav mle purane šupe hem ka vazdav po bare, i adathe ka čivav sa o điv hem avera šukaripa.

<sup>19</sup> Tegani ka vačerav mla dušace: 'Isi tut baro barvalipe bute beršende. Odmorin, ha, pi hem uživin!'

<sup>20</sup> Ali o Devel phenda lese: 'Hulavona! Akaja rat ka mere! A sa adava so spremindan, kasoro ka ovel?'

<sup>21</sup> Adahari okolese kova pese čedela barvalipe, a čororoi anglo Devel."

*O Devel brinini pe zako ple učenci (Mt 6,25-34)*

<sup>22</sup> Tegani o Isus phenda ple učenikonende: "Adalese vačerava tumende: ma oven zabrinuta zako tumaro dživdipe: ka ovel tumen li so te han; ni zako tumaro telo: ka ovel tumen li so te urjaven.

<sup>23</sup> Adalese soi o dživdipe po bitno e hajbnastar hem tumaroi telo po bitno e šejendar.

<sup>24</sup> Dikhen e gavranen! Ni sejnena ni čedena, nane len ni šupa kote te čiven o điv, a palem o Devel parvari len. A tumen injen e Devlese po vredna e čirikljendar!

<sup>25</sup> A kova tumendar šaj adaleja so brinini pe te produžini hari plo dživdipe?

<sup>26</sup> Znači te našti ni adava najhari te čeren, sose onda brininena tumen zako bilo so aver?

<sup>27</sup> Dikhen o divlja luluđa sar barjona. Na čerena buti, niti sivenafse šėja, a vačerava tumende da ni o caro o Solomon, kova inele but barvalo, na inole edobor šuže šėja sar jekha olendar.

<sup>28</sup> Te o Devel adahar šukar urjavela o biljke ko polje savei avdive adathe, a već tejsa frdena pe ani jag, kobor li više tumende ka del šėja, tikora verakere manušalen!

<sup>29</sup> Tumen ma oven zabrinuta zako adava so ka han hem so ka pijen,

<sup>30</sup> adalese so adava rodona okola kola na džanen e Devlese. Tumaro Dad, o Devel, džanel da valjani tumende sa adava.

<sup>31</sup> Nego roden o carstvo e Devlesoro, a ov ka del tumen sa adava so valjani tumende!

<sup>32</sup> Ma daran, mlo tikoro stado! Tumare Dadesiri volja inele te del tumen o carstvo.

<sup>33</sup> Bikninen so isi tumen hem o pare den e čororende! Čeren tumende kese zako pare save na properena hem barvalipe ko nebo savo nikad na tikorini. Niko naka šaj te avel adari te čorel tumaro barvalipe hem nijekh moljco naka uništini le.

<sup>34</sup> Adalese so tumaro vilo ka ovel adari kaj tumaro barvalipe."

*Oven uvek spremna zako e Isusesoro aviba (Mt 24,45-51)*

<sup>35</sup> O Isus ple učenikonende phenda hem akava: "Oven spremna, urjavde zaki buti hem tumare svetiljke te oven tharde,

<sup>36</sup> sar sluge kola adžicerena ple gospodare te irini pe čhere taro bijav. Kad irini pe o gospodari hem kad khuvela ko udar, o slugei spremna te phraven lese.

<sup>37</sup> Blago okole slugende kolen o gospodari, kad ka avel, ka arakhi len sar adžicerena le džangale! Čače, vačerava tumende, ov, o gospodari, ka phandel pe i kecelja, ka bešljačeri len te han hem ka kandel len.

<sup>38</sup> Blago e slugende kolen o gospodari ka arakhi džangalen čak hem te alo ki ekvaš i rat ili anglo disljojb.

<sup>39</sup> Ali akava te džanen: te džanel ine o domačini ko savo sati avela o čor, naka mukel lese ine te đerdini ko čher te čorel.

<sup>40</sup> Hem tumen oven spremna, adalese so o Čhavo e manušesoro ka avel tegani kad na nadinena tumen!"

<sup>41</sup> Tegani o Petar pučlja e Isuse: "Gospode, vačereja li akaja priča samo amende e učenikonende ili sarijende?"

<sup>42</sup> O Gospod Isus phenda: "Kovai, onda, verno hem mudro upravniko kas o gospodari ka čhivel upreder ple sluge te del len hajba ko vreme?"

<sup>43</sup> Blago okole slugase kas lesoro gospodari, kad ka avel, ka arakhi sar čerela adahar.

<sup>44</sup> Čače vačerava tumende, upreder sa o barvalipe plo ka čhivel le sar upravniko.

<sup>45</sup> A te vačerđa adava sluga ana peste: 'Naka avel pana mlo gospodari' i lela te marel avere slugen, hem te hal, te pijel hem te mačol,

<sup>46</sup> lesoro gospodari ka avel ano okova dive hem okova sati kad naka adžiceri le, ka čhinel le ko ekvaš hem ka čhivel le maškaro nevernici.

<sup>47</sup> A okova sluga kova džanda i volja ple gospodaresiri, a na inele spremno ili na čerđa pali e gospodaresiri volja, but mariba ka hal.

<sup>48</sup> A okova kova na džanda e gospodaresiri volja, a čerđa nešto zako so zaslužini kazna, hari mariba ka hal. Kasei dindo but, but ka rodel pe lestar. Kasei poverime but, više ka rodel pe lestar."

*E Isusesoro lafi ka anel podela  
(Mt 10,34-36)*

<sup>49</sup> Tegani o Isus phenda: "Aljum te frdav jag e sudosiri ki phuv. So bi mangava ine već te ovel thardi!

<sup>50</sup> A valjani te nakhavav e patibnasoro krstiba. But maje pharo đikote adava na završini pe!

<sup>51</sup> Mislinena da aljum te anav mir ki phuv? Na. Aljum te čerav o manuša te ciden pe jekh averestar.

<sup>52</sup> Adalese od akana, oto pandž čherutne, trin ka oven ki mli strana, a duj ki aver ili duj ki mli strana, a trin ki aver.

<sup>53</sup> Ka uštel o dad upro čhavo hem o čhavo upro dad, i daj upri čhaj hem i čhaj upri daj, i sasuj upri bori hem i bori upri sasuj."

*Valjani te pendžaren o znakija e vremenese  
(Mt 16,2-3; 5,25-26)*

<sup>54</sup> Tegani o Isus vačerđa e narodose: "Kad dikhena da o oblaci avena taro zapad, tegani phenena da ka perel bršim, i čače perela.

<sup>55</sup> Kad phudela i barval taro jug, phenena da ka ovel tatipe, i ovela.

<sup>56</sup> Dujemujengere manušalen! Džanen te pendžaren o izgled e phuvjakoro hem e nebosoro; sar onda na džanen te pendžaren o znakija akale vremenese?"

<sup>57</sup> Tumen korkore valjani te pendžaren okova soi ispravno.

<sup>58</sup> Te neko legari tut ko sudo te tužini tut adalese so na irindan lese o pare, odrumal de sa tutar te mirine tut oleja angleder nego so resena adari. Te na čerđan adahar, ov šaj te vucini tut anglo sudija, a o sudija ka del tut ko manuš kova ka čhivel tut ano phandlipe.

<sup>59</sup> Vačerava će da čače naka ikljove adathar sa đikote na irineja di i zadnjo para."

## 13

*Sare valjani te pokajinen pe zako pumare grehija*

<sup>1</sup> Ano adava vreme nesave manuša phende e Isuseso so o Pilat, o upravniko e rimesoro, naredinda nesave Galilejci te

oven mudarde sar anena ine žrtve ano Hram.

<sup>2</sup> A o Isus phenđa lenđe: “Tumen li mislinena da adala Galilejci, adalese so ađahar mudardile, inele po grešna sa avere Galilejconendar?”

<sup>3</sup> Na! Ali te na pokajinđen tumen, sarijen tumen ka adžičeri propast!

<sup>4</sup> Ili okola dešu ofto upro kolende peli i kula ano Siloam hem mudarđa len, tumen li mislinena da on inele po bare grešnici sa e manušendar kola živinena ano Jerusalem?

<sup>5</sup> Na! Ali te na pokajinđen tumen, sarijen tumen ka adžičeri propast!”

### *I priča oto kaš bizo plod*

<sup>6</sup> Tegani o Isus vačerđa lenđe akaja priča: “Inele nesave manuše smokva sadime pese ano vinograd, i alo te rodel lakoro plod, ali ništa na arakhlja.

<sup>7</sup> Tegani phenđa e vinogradarese: ‘Ače, trin berš sar avava te rodav plod upri akaja smokva, ali na arakhava le. Čin la! Sose te šučari i phuv?’

<sup>8</sup> A ov phenđa: ‘Gospodarona, ačhav la pana akava berš. Ka handav okolo late hem ka frdav laće đubravo,

<sup>9</sup> i šaj đi berše ka anel plod. A te na bijanđa, ka čine la.’ ”

### *O Isus sasljarj ko savato e đuvlja koja inele grbavo*

<sup>10</sup> I jekh savato sar o Isus sikaj ine ani jekh sinagoga,

<sup>11</sup> adari inele nesavi đuvli kola o bišukar duho čerela ine te ovel namborme. Oj inele grbavo dešu ofto berš hem nisar našti ine te ispravini pe.

<sup>12</sup> Kad o Isus dikhlja la, vičinđa la kora peste hem phenđa laće: “Đuvlije, oslobodimi injan taro to nambormipe!”

<sup>13</sup> I čivđa ple vasta upro late, a oj otojekhvar ispravinđa pe hem lelja te slavini e Devle.

<sup>14</sup> Tegani e sinagogakoro vođa, holjame so o Isus sasljarđa ko savato, phenđa e narodose: “Isi šov dive ano kurko ko save šaj te čerel pe buti! Ko adala dive aven hem oven sasljarde, a na ko savato!”

<sup>15</sup> A o Gospod Isus phenđa lese: “Duje-mujengere injen! Tumen li ko savato na

phravena tumare guruve ili tumare here taro jasle te legaren le te pijel pani?”

<sup>16</sup> A akajai đuvli oto pleme e Avraame-soro kola o Sotoni ičerđa phandlja dešu ofto berš. Oj li na valjani te ovel phravdi taro akala lancija e nambormipasere ko savato?”

<sup>17</sup> Kad phenđa adava, lađandile sare kola inele protiv leste, a sa avera manuša radujinde pe zako sa o šukar delja save o Isus čerđa.

### *O carstvo e Devlesoroj sar o tikoro seme savo ovela baro kaš*

*(Mt 13,31-33; Mk 4,30-32)*

<sup>18</sup> Tegani o Isus phenđa: “Savesei slično o carstvo e Devlesoro? Soja te uporedinav le?”

<sup>19</sup> Sličnoi e semese oti gorušica save o manuš lelja hem frdinđa pese ki bašta. Ov barilo hem ulo kaš, hem o čiriklja čerde gnezdija upro lesere granke.”

### *O carstvo e Devlesoroj sar o kvasco savo čerela o humer te uštel*

<sup>20</sup> I palem phenđa: “Soja te uporedinav o carstvo e Devlesoro?”

<sup>21</sup> Sličnoi e kvascose save i đuvli lelja hem čivđa ano but baro čaro vareja, i ov čerđa sa o humer te uštel.”

### *Den sa tumendar te đerdinen ano carstvo e Devlesoro*

*(Mt 7,13-14, 21-23)*

<sup>22</sup> I sar o Isus džala ine ple dromeja đi ko Jerusalem, nakhela ine ko dizja hem ko gava hem sikaj e narodo.

<sup>23</sup> I neko pučlja le: “Gospode, samo li hari manuša ka oven spasime?”

A o Isus phenđa lenđe:

<sup>24</sup> “Den sa tumendar te đerdinen maškaro tesno udar e nebosoro adalese so but džene, vačerava tumenđe, ka roden te đerdinen, ali naka šaj.

<sup>25</sup> Kad o domačini ka uštel hem ka phandel o udar, ka ovel kasno. Tegani ka terđoven avri hem ka khuven ko udar vačerindoj: ‘Gospodarona, phrav amende!’ Ali ov ka phenel tumenđe: ‘Na džanav tumen kotar injen.’

<sup>26</sup> Tegani ka phenen: ‘Haljam hem piljam tuja, hem tu sikavđan ko amare dizjengere droma.’

<sup>27</sup> A ov ka phenel: 'Na džanav tumen kotar injen. Ciden tumen mandar, sare tumen kola ćerena bišukaripe!'

<sup>28</sup> Tegani ka ovel baro rojba hem krciba e dandengoro tari dukh kad ka dikhen e Avraame, e Isaake, e Jakove hem sa e prorokonen ano carstvo e Devlesoro, a tumen frdime avri.

<sup>29</sup> O manuša ka aven taro istok hem taro zapad, taro sever hem taro jug hem ka čhiven pe uzalo astali ki gozba ano carstvo e Devlesoro.

<sup>30</sup> Aće, okola kolai akana prva tegani ka oven zadnja, a okola kolen akate dikhena sar zadnjonen adari ka oven prva."

### *E Isusesei phare zako manuša taro Jerusolim*

*(Mt 23,37-39)*

<sup>31</sup> I tegani nesave fariseja ale koro Isus hem phende lese: "Dža akatar ko nesavo aver than, adalese so o caro o Irod mangela te mudari tut."

<sup>32</sup> O Isus phenđa lenđe: "Džan hem vaćeren adala lisicaće: 'Ka ispuđinav e demonen hem ka saslarav avdive hem tejsa, a ko trito dive završinava mli buti.'

<sup>33</sup> Ali avdive, tejsa hem prektejsa valjani te džav mle dromeja, adalese so izgledini dai o Jerusolim than kote sa o proroci valjani te oven mudarde.

<sup>34</sup> Jerusalime, Jerusalime, tu savo mudareja e prorokonen hem frdeja bara upro okola kolai tuće bićhalde! But puti mangljum te ćedav te manušen sar i khani ple pilićken talo ple phaka, ali tumen na mangljen!

<sup>35</sup> Aće, to čher ka ovel napustime! I vaćerava tumenđe da čaće naka dikhen man đikote na phenena: 'Blagoslovime! okova kova avela ano anav e Gospodesoro!'

## 14

### *O Isus anglo fariseja sasljari e namborme ko savato*

<sup>1</sup> I ko jekh savato, o Isus inele vićime ko čher nesave farisejengere vođasoro te hal maro, i dželo. Sare so inele adari, šukar ine posmatrinena le,

<sup>2</sup> adalese so anglo leste inele nesavo namborme manuš kasere vasta hem o pre inele pherde pani.

<sup>3</sup> I o Isus pućlja e učiteljen e Zakonestar hem e farisejen: "Palo e Mojsijasoro zakoni, tromal pe li te sasljari pe ko savato ili na?"

<sup>4</sup> A on ništa na phende. Tegani o Isus čhivđa plo vas upro namborme manuš, saslarđa le hem muklja le te džal.

<sup>5</sup> A olenđe phenđa: "So mislinena tumaro čhavo ili tumaro guruv ko savato perela ano bunari, na li sigate ka ikalen le ine adathar?"

<sup>6</sup> I na ine len so te phenen ko adava.

### *O Isus sikaj oti poniznost*

<sup>7</sup> Kad o Isus dikhlja sar o gostija kola ale te han rodenafse najšukar thana bešibnase, phenđa lenđe akaja priča:

<sup>8</sup> "Kad injan vićime nekase ko bijav, ma beš ko najšukar than, adalese so šaj maškaro vićime isi nesavo manuš kovai po baro tutar.

<sup>9</sup> Tegani okova so vićinđa tut ka phenel će: 'De to than akalese.' Tegani ka ove lađardo, i ka dža te dole o zadnjo than.

<sup>10</sup> Nego, kad injan vićime, dža hem beš ko zadnjo than. Kad ka dikhel tut okova so vićinđa tut ka phenel će: 'Amala, ava beš ko po šukar than!' Tegani sa o gostija ka dikhen kobor injan poštujime.

<sup>11</sup> Adalese, ko pes povazdela, ka ovel peravdo; a ko ponizini pe, ka ovel povazdime."

<sup>12</sup> Tegani o Isus phenđa okolese so vićinđa le: "Kad vićineja gostonen ko rućko ili ki večera, ma vićin samo te amalen, te phraljen, te familija, hem te barvale komšijen. Te vićinđan olen, hem on tut ka vićinen ko hajba kora pumende sar te irinen će.

<sup>13</sup> Nego, kad vićineja ko hajba, vićin e ćororen, e sakatimen, e bangen hem e kororen.

<sup>14</sup> Tegani ka ove blagoslovime, adalese so olen nane sar te irinen će. A o Devel ka irini će tegani kad ka vazdel taro mule e pravednikonen."

### *I priča oti bari gozba (Mt 22,1-10)*

15 Kad adava šunđa jekh okolendar so beštine uzalo astali, phenđa e Isusese: “Bahtaloj okova kova ka hal maro ano carstvo e Devlesoro!”

16 A ko adava, o Isus phenđa lese: “Nesavo manuš ćerđa bari gozba hem vičinda bute manušen.

17 I kad sa inele ćerdo hajbnase, bičhalđa ple sluga te phenel e vičimende: ‘Sai akana spremno. Aven!’

18 Ali jekh pala avereste lelje te phenen lese sose našti te aven. O prvo phenđa lese: ‘Čindum njiva i valjani te džav te dikhav la. Molinava tut, vačer te gospodarese da adalese našti te avav.’

19 O dujto phenđa: ‘Samo so čindum deše guruven i džava te dikhav sar ka orinen. Molinava tut, vačer te gospodarese da adalese našti te avav.’

20 O trito phenđa: ‘Samo so ženindum man i adalese našti te avav.’

21 I o sluga irinda pe hem phenđa sa adava ple gospodarese. Tegani o gospodari holjanda i phenđa ple slugase: ‘Sidar, ikljov ko droma e dizjakere hem ko trgija i ana akari e čororen, e sakatimen, e kororen hem e bangen.’

22 Kad o sluga ćerđa adava, phenđa: ‘Gospodarona, ćerđum adahar sar so naredindan, ali pana isi thana.’

23 I o gospodari phenđa lese: ‘Ikljov avri tari diz ko droma hem ko staze hem terin e manušen te aven te ovel pherdo mlo čher.

24 Vačerava tumende da nijekh okole manušendar kola inele vičime naka hal ki mli gozba.’ ”

*E Isusesere učenici valjani te trpinen zbog olese*

*(Mt 10,37-38)*

25 I but manuša džana ine dromeja palo Isus. Ov irinda pe nakoro lende hem phenđa lende:

26 “Te neko mangela te ovel mlo učeniko, valjani te volini man but više nego ple dade hem pla daja, pla romnja hem ple čhaven, ple phraljen hem ple phenjen, više nego plo dživdipe. Te na ćerđa adahar, našti te ovel mlo učeniko.

27 Ko na akhari plo krsto hem na džala pala mande, našti te ovel mlo učeniko.

28 Adalese so, ko tumendar ka lel ine te vazdel kula, a angleder adalestar te na bešel te računini o troško te dikhel ka šaj li te završini la?

29 Te samo čhivđa o temelji, i na ačhola le pare te završini đi o kraj, sare kola ka dikhel adava ka asan lese

30 hem ka phenen: ‘Akava manuš lelja te vazdel kula, a našti ine te završini la!’

31 Ili, kova caro kad džala te arakhi pe ko mariba avere caronencar, angleder adalestar na bešela te razmislini šukar ka šaj li ple deše hiljadencar te marel pe adaleja kova avela protiv leste ple biše hiljadencar?

32 Te našti, ka bičhali ple manušen koro aver caro, sar pana na alo paše, te pučen le savei o uslovija zako mir.

33 Adahar da svako tumendar kova na mukela sa so isi le, našti te ovel mlo učeniko.”

*O učenici valjani te ačhoven verna sledbenici e Isusesere*  
*(Mt 5,13; Mk 9,50)*

34 Tegani o Isus phenđa: “Šukari o lon. Ali te našalđa plo londipe, soja ov ka londari pe?

35 Esavko nane šukar ni zaki phuv ni zako đubrivo, nego frdela pe. Kas isi kana te šunel, nek šunel!”

## 15

*I priča oto našaldo bakro*

*(Mt 18,12-14)*

1 But carinici hem prešunde grešnici čedena pe ine uzalo Isus te šunen le.

2 A o fariseja hem o učitelja e Zakonestar lelje te gundinen vačerindoj: “Akava primini kora peste e grešnikonen hem hala olencar.”

3 Adalese o Isus phenđa lende akaja priča:

4 “Te nekas tumendar isi šel bakre i jekh olendar našaldilo, so ka ćerel? Ka ačaj e enjavardešu enjen ko polje hem ka džal te rodel e našalde bakre sa đikote na arakhi le.

5 I kad ka arakhi le, ka radujini pe, ka čhivel le ko piče

6 hem ka legari le čhere. Tegani ka vičini ple amalen hem ple komšijen kora

peste hem ka phenel lenđe: 'Radujinen tumen mancar! Arakhljum mle našalde bakre.'

<sup>7</sup> Vačerava tumenđe, ađahar da ano nebo ka ovel po bari radost zako jekh grešniko kad pokajini pe nego li zako enjavardešu enja pravednici kolenđe na valjani pokajanje."

### *I priča oti našaldi kovanica*

<sup>8</sup> O Isus phenđa hem akava: "Ili te nesava đuvlja isi deš srebrna kovanice, i jekh našali, so ka ćerel? Ka tharel i svetiljka, ka šulaj o čher hem šukar ka rodel i kovanica đikote na arakhi la.

<sup>9</sup> I kad ka arakhi la, ka vičini ple amalinen hem ple komšiken kora peste hem ka phenel lenđe: 'Radujinen tumen mancar! Arakhljum i kovanica savi našaldum.'

<sup>10</sup> Ađahar, vačerava tumenđe, ovela radost maškaro anđelja e Devlesere zako jekh grešniko kova pokajini pe."

### *I priča oto našaldo čhavo*

<sup>11</sup> I o Isus phenđa: "Jekhe manuše ine duj čhave.

<sup>12</sup> I o tikneder čhavo phenđa ple dadese: 'Dade, de man akana o deo te barvalipnastar so pripadini maje.' I ađahar o dad podelinda lenđe plo barvalipe.

<sup>13</sup> I palo nekobor dive o tikneder čhavo čedinđa sa so inole, dželo ki durutni phuv hem adari halja sa plo barvalipe ađahar so živinda dilikane.

<sup>14</sup> Kad trošinda sa o pare, ulo baro bokhalipe ani adaja phuv i tegani na inole so te hal.

<sup>15</sup> I dželo te ćerel buti koro jekh manuš kova živinda adari. Adava manuš bičhalđa le pese ko polje te arakhi balen.

<sup>16</sup> O čhavo edobor inele bokhalo da manglja te hal adava so hana o bale, ali niko na dinda le čak ni adava.

<sup>17</sup> A kad lelja te razmislini šukar, phenđa ana peste: Mle dadesere bućarnen isi da buderi hajbnase, a me akate merava bokhatar!

<sup>18</sup> Ka uštav hem ka irinav man koro mlo dad hem ka phenav lese: 'Dade, grešindum anglo Devel hem angla tute!

<sup>19</sup> Na injum dostojno akana te vičinav man to čhavo. Molinava tut, le man sar jekhe bućarne te ćerav buti kora tute.'

<sup>20</sup> I uštino hem lelja te džal koro plo dad. Pana sar inele dur, lesoro dad dikhlja le sar avela, pelo lese žal, prastandilo nakoro leste, zagrlinda le hem čumudinda le.

<sup>21</sup> Tegani o čhavo phenđa: 'Dade, grešindum anglo Devel hem angla tute! Na injum dostojno akana te vičinav man to čhavo.'

<sup>22</sup> A o dad phenđa ple slugenđe: 'Sig anen o najšužo ogrtači hem urjaven le! Čhiven lese i angrustik ko naj hem o sandale ko pre!

<sup>23</sup> Anen okole thuljarde telco te čhinen, te ha hem te veselina amen,

<sup>24</sup> adalese so akava mlo čhavo inele mulo, a akana oživinda, inele našaldo, a akanai arakhlo.' I lelje te veselinen pe.

<sup>25</sup> A lesoro phureder čhavo ćerela ine buti ki njiva. I ko iriba, sar avela ine paše uzalo čher, šunđa bašaliba hem čheliba.

<sup>26</sup> Tegani vičinda jekhe sluga te pućel le so ulo adava.

<sup>27</sup> O sluga phenđa lese: 'To phral irinda pe čhere. To dad čhinda e thuljarde telco adalese so dikhlja le dživde hem saste.'

<sup>28</sup> I o phureder čhavo holjanda hem na manglja te đerdini ko čher. Tegani lesoro dad iknilo hem molinda le te đerdini.

<sup>29</sup> A ov phenđa ple dadese: 'Aće, sa edobor berša sar robo kandava tut hem nikad na phagljum to lafi, a nijekhvar na dindan man ni buzore te šaj mle amalencar te veselinav man.

<sup>30</sup> A kad alo akava to čhavo, kova halja to barvalipe e kurvencar, tu čhinda lese thuljarde telco.'

<sup>31</sup> A lesoro dad phenđa lese: 'Mlo čhavo, tu stalno injan mancar. I sa soi mlo - kloj.

<sup>32</sup> Ali, valjandam ađahar te veselina amen hem te radujina amen adalese so akava, to phral, inele mulo, a akana oživinda; inele našaldo, a akanai arakhlo!'"

## 16

### *I priča oto nepošteno upravniko*

<sup>1</sup> O Isus ple učenikonende vaćerđa: "Jekhe barvale manuše ine upravniko kole tužinde da halja lesoro barvalipe.



<sup>2</sup> I o barvalo vičinda le hem phenda lese: 'So šunava tutar adava? Ana maje o spisko te dikhav so čerđan mle parenkar adalese so našti više te čere buti kora mande sar upravniko!'

<sup>3</sup> Tegani o upravniko phenda ana peste: 'So ka čerav kad mlo gospodari ka cidel man tari buti? Na injum edobor zoralo te handav, a lađava te prosinav.

<sup>4</sup> Džanav so te čerav te šaj o manuša priminen man pumende ano čhera kad ka ovav cidime tari buti.'

<sup>5</sup> I vičinda sa ple gospodaresere dužnikonen, i pučlja e prvone: 'Kobor aveja mle gospodarese?'

<sup>6</sup> A ov phenda: 'Šel burija uljeja.'

Tegani o upravniko phenda lese: 'Sidar le to lil kaj pisime kobor aveja lese hem čhiv da aveja lese pinda.'

<sup>7</sup> I pučlja avere: 'A tu kobor aveja mle gospodarese?'

A ov phenda: 'Šel burija diveja.' I olese da phenda o upravniko: 'Le to lil hem čhiv da aveja lese oftovardeš.'

<sup>8</sup> I o gospodari pohvalinda e nepoštenone upravniko so inele džando hem so ađahar postupinda. Akava mothoj dai o manuša akale svetosere po džande ko postupci premalo okolende kolai slična olenđe, nego o manuša e svetlosere.

<sup>9</sup> Vačerava tumende: čeren tumende amalen ađahar so ka pomožinen lende akala phuvjakere barvalipnaja, te šaj, kad ka nakhel adava barvalipe, te oven primime ano večna čhera.

<sup>10</sup> Kovai verno ano najtikore buća, ov ka ovel verno hem ano najbare; a kova nane pravedno ano najtikore buća, ov naka ovel pravedno hem ano najbare.

<sup>11</sup> Te na injen verna ano akala phuvjakoro barvalipe, ko ka mukel tumende ano vasta o čačikano barvalipe?

<sup>12</sup> Te na injenle verna ano averesoro barvalipe, ko ka del tumen tumaro?

<sup>13</sup> Nijekh sluga našti kandel duje gospodaren. Ili ka mrzini jekhe, a ka volini e dujtone; ili jekhesse ka ovel poslušno, a e dujtone naka podnosini. Našti kanden hem e Devle hem o barvalipe."

<sup>14</sup> Sa adava, so vačerđa o Isus, šunde o fariseja kola but volinde pare, i asandile lese.

<sup>15</sup> A o Isus phenda lende: "Tumen injen adala so čerena tumen pravedna anglo manuša, ali o Devel džanel tumare vile. Okova soi but vredno e manušenje, adavai gadno e Devlese."

### *O lafi e Devlesoro isi le trajno autoritet*

<sup>16</sup> Tegani o Isus phenda: "O Zakoni e Mojsijasoro hem o Lila e prorokonengere sikavena ine e manušen di o aviba e Jovanesoro, a od tegani propovedini pe o šukar lafi taro carstvo e Devlesoro hem svako nasilno đerdini ano leste.

<sup>17</sup> A palem, po lokhe o nebo hem i phuv te nakhen, negoli jekh slovo oto Zakoni te properel.

<sup>18</sup> Jekh primer: Ko tumendar ačaj pla romnja hem lela avera, čerela preljuba. Hem ko lela romnja kola o rom muklja, isto čerela preljuba."

### *Priča oto barvalo manuš hem oto Lazar*

<sup>19</sup> O Isus phenda: "Inele nesavo barvalo manuš kova urjela pe ine sa ano najšuže šeja hem taro dive ko dive hala ine sa najšukar habinja.

<sup>20</sup> Angli lesiri kapija sa ano čirevija pašljola ine nesavo čororo manuš palo anav Lazar.

<sup>21</sup> Ov but manglja te čaljari pe e troškendar save perena ine taro astali e barvalesoro. Čak hem o đukle avena ine hem ližinena lesere čirevija.

<sup>22</sup> Kad mulo o čororo, o anđelja legarde le e Avraamese ki angali. I o barvalo da mulo hem inele parume.

<sup>23</sup> I ano than e mulengoro, ano bare muke, o barvalo vazdinda ple jača hem odural dikhlja e Avraame hem e Lazare lese ani angali.

<sup>24</sup> Tegani vičinda: 'Dade Avraame, smilujin tut maje hem bičhal e Lazare te čhivel samo hari plo naj ano pani hem te avel te šudari mli čhib, adalese so but injum mučime ani akaja jag.'

<sup>25</sup> A o Avraam phenda: 'Mlo čhavo, setin tut da primindan to šukaripe tuće ko dživdipe, a o Lazar plo bišukaripe. A akanai e Lazarese šukar akate, a tu mučineja tut."

<sup>26</sup> Sem adava, isi bari provalija maškar amende hem tumende i te manglja neko te nakhel akatar kora tumende ili adathar kora amende, naka šaj.'

<sup>27</sup> A o barvalo phenđa: 'Onda molinava tut, dade Avraame, bičhal e Lazare mle dadese ko čher.

<sup>28</sup> Adari isi man pandž phralja. Nek o Lazar upozorini len, te na aven hem on ko akava than e mukengoro.'

<sup>29</sup> A o Avraam phenđa: 'Isi len o Zakoni e Mojsijasoro hem o Lila e prorokonengere. Nek šunen olen!'

<sup>30</sup> A ov phenđa: 'Nane adava dovoljno, dade Avraame! Ali te alo lenđe neko taro mule, ka obratinen pe.'

<sup>31</sup> I o Avraam phenđa lese: 'Te na šunde adava so pisinđa o Mojsije hem o proroci, naka šunen ni te neko uštino taro mule.' "

## 17

*O učenicu valjanena te oven verna sluge e Devlesere*

*(Mt 18,6-7, 21-22; Mk 9,42)*

<sup>1</sup> O Isus phenđa ple učenikonende: "O iskušnja mora te aven, ali jao okolese prekala kaste avena.

<sup>2</sup> Olese ka ovel ine po šukar ki men te ovel lese phandlo baro bar hem te ovel frdime ano more, nego te čerel jekh akale tikorendar te perel ano greh.

<sup>3</sup> Arakhen tumen! Te to phral grešini, ukorin le, i te pokajinđa pe, oprostini lese.

<sup>4</sup> I te epta puti ko dive grešini premala tute hem epta puti avela kora tute hem vačeri će: 'Kajinav man', oprostini lese."

<sup>5</sup> O apostolja phende e Gospodese: "De amen po bari vera!"

<sup>6</sup> A o Gospod phenđa: "Te isi tumen vera tikori sar zrno oti gorušica, ka phenen ine akale kaštese: 'Ikal tut taro koreno hem sadin tut ano more!' I ka šunel tumen ine.

<sup>7</sup> Te phena da nekas tumendar isi sluga kova handela ili arakhi e bakren. I kad ov irini pe tari njiva, ko tumendar ka phenel lese: 'Siđar ava akari hem beš te ha maro?'

<sup>8</sup> Na li, umesto adava, ka phenen lese: 'Čer maje te hav, phand tut i kecelja hem

kande man đikote hava hem pijava, a palo adava tu ka ha hem ka pije?'

<sup>9</sup> Valjani li o gospodari te zahvalini e slugase so čerđa adava so ine lese naredime? Na.

<sup>10</sup> Adahar hem tumen, kad čerena sa so naredinđa tumende o Devel, vačeren: 'Amen injam sluge kolende na valjani te zahvalini pe! Čerđam samo soi amari buti!' "

*O Isus sasljari deše gubavconen*

<sup>11</sup> I sar o Isus džala ine nakori diz Jerusolim, nakhino maškari regija Samarija hem i regija Galileja.

<sup>12</sup> I sar đerdini ine ko nesavo gav, nakoro leste ale deš gubavci kola terdine po dur olestar

<sup>13</sup> hem vičinde: "Isuse, Gospodarona, smilujin tut amende!"

<sup>14</sup> Kad dikhlja len o Isus, phenđa lenđe: "Džan hem mothoven tumen e sveštenikonende!"

I sar džana ine dromeja, saslile tari guba.

<sup>15</sup> I jekh olendar kad dikhlja so saslilo, irinđa pe koro Isus slavindoj e Devle oto sa o glaso.

<sup>16</sup> Pelo anglo lesere pre mujeja di phuv, zahvalindoj lese. A ov inele Samarijanco.

<sup>17</sup> Tegani o Isus pučlja: "Na li deš saslile? A kaj pana okola enja?"

<sup>18</sup> Nijekh li olendar na aračhilo te irini pe hem te slavini e Devle, sem akava jekh kova čak nane ni Jevrejco?"

<sup>19</sup> I phenđa e manušese: "Ušti hem dža! Ti vera spasinđa tut!"

*O aviba e Devlesere carstvosoro*

*(Mt 24,23-28, 37-41)*

<sup>20</sup> Jekh dive o fariseja pučle e Isuse kad ka avel o carstvo e Devlesoro. O Isus phenđa lenđe: "O carstvo e Devlesoro na avela e znakonencar saven ka šaj te dikhen pe.

<sup>21</sup> Naka šaj te phenel pe: 'Ače akatei!' ili 'Eče adari!' Adalese soi o carstvo e Devlesoro maškara tumende!"

<sup>22</sup> Tegani phenđa ple učenikonende: "Avela o vreme kad ka mangel te dikhen samo jekh dive e Manušesere Čhavesoro, ali naka šaj te dikhen le.

<sup>23</sup> O manuša ka phenen tumenđe: 'Eče adari!' ili 'Ače akatei!' Ali ma džan adari hem ma prastan palo lende!

<sup>24</sup> Adalese so o aviba e Manušesere Čhavesoro ko lesoro dive ka ovel sar kad i munja činela taro jekh krajo e nebosoro, a svetlini ko dujto.

<sup>25</sup> Ali angleder adalestar valjani but te patini hem te ovel odbacime akala generacijatar.

<sup>26</sup> Hem sar so inele ano vreme kad o Noje živinda, ađahar ka ovel hem ano vreme kad me, o Čhavo e manušesoro, ka avav.

<sup>27</sup> O manuša hana ine hem pijena, lena pe hem dena pe sa đi o dive kad o Noje đerdinda ki barka. Tegani alo o baro pani hem tasavđa sarijen.

<sup>28</sup> Ađahar da inele ano vreme kad o Lot živinda. O manuša ani diz Sodoma hana ine hem pijena, činena hem biknena, sadinena hem vazdena čhera.

<sup>29</sup> A ko dive kad o Lot iklilo tari Sodoma, odupral sar bršim peli jag hem sumpor hem mudarđa sarijen.

<sup>30</sup> Ađahar ka ovel hem ko dive kad o Čhavo e manušesoro ka mothoj pe.

<sup>31</sup> Ko adava dive, ko ka ovel upro čher, a lesere stvariya ano čher, ma te huljel te lel len. Ađahar da, ko ka ovel ki njiva, ma te irini pe čhere palo ple stvariya.

<sup>32</sup> Setinen tumen so ulo e Lotesere romnjaja!

<sup>33</sup> Ko dikhela te arakhi plo dživdipe, ka našali le, a ko našali plo dživdipe zbog mande, ka arakhi le.

<sup>34</sup> Vačerava tumenđe: ki adaja rat duj džene ka pašljon ani jekh soba; jekhe ka lel pe, a e dujtone ka ačaj pe.

<sup>35</sup> Duj đuvlja zajedno ka ćeren hajbnase; jekha ka lel pe, a e dujtona ka ačaj pe.

<sup>36</sup> [Duj murša ka ćeren buti ki njiva; jekhe ka lel pe, a e dujtone ka ačaj pe.]”

<sup>37</sup> I on pučle e Isuse: “Kaj, Gospode?”

A ov phenđa lende: “Kaj isi mulo telo, adari čedena pe o lešinariya.”

## 18

*I priča oti udovica koja inele istrajno*

<sup>1</sup> Tegani o Isus vačerđa ple učenikonenđe priča da uvek valjani te molinen pe hem te na odustajinen.

<sup>2</sup> Phenđa: “Inele nesavo sudija ani jekh diz. Na darandilo e Devlestar hem na ačhilo lese đi o manuša.

<sup>3</sup> A inele hem nesavi udovica ani adaja diz. Oj stalno avela ine koro leste hem molini le: ‘De man pravda anglo okova kova tužini man!’

<sup>4</sup> Ov jekh vreme na manglja te pomožini laće. Ali kad nakhlo nesavo vreme, phenđa korkoro pese: ‘Iako na darava e Devlestar hem na ačhilo maje đi o manuša,

<sup>5</sup> ka dav pravda akala udovicaće, adalese so stalno avela kora mande, i te na avel više te dosadini man!’ ”

<sup>6</sup> Tegani o Gospod Isus phenđa: “Šunen šukar so phenđa o nepravedno sudija!

<sup>7</sup> O Devel li naka del pravda ple izabiri-menđe kola rat hem dive molinena le? Ov li ka ačaj len te adžićeren?

<sup>8</sup> Vačerava tumenđe, ka del len pravda, hem adava sigate. Ali kad me, o Čhavo e manušesoro, ka irinav, ka arakhav li vera ki phuv?”

### *I priča oto farisej hem oto cariniko*

<sup>9</sup> Tegani o Isus vačerđa akaja priča okolende kola mislinde dai pravedna, a averen dikhle sar po tikoren pumendar:

<sup>10</sup> “Duj manuša dzele ko Hram te molinen pe: jekh inele farisej, a o dujto cariniko.

<sup>11</sup> O farisej, terdindoj, molinda ana peste ađahar: ‘Devla, hvala će so na injum sar avera manuša: čora, nepravedna, preljubnici ili sar akava cariniko.

<sup>12</sup> Postinava duj puti ano kurko hem dava desetak oto sa so zaradinava.’

<sup>13</sup> A o cariniko, terdindoj odural, na manglja ni te dikhel nakoro nebo, nego khuvela pe ine ko gruča oti tuga hem vaćeri: ‘Devla, smilujin tut maje, e grešnikose!’

<sup>14</sup> Vačerava tumenđe: akava cariniko irinda pe čhere opravdime anglo Devel, a na o farisej! Adalese so ko pes povazdela, ka ovel peravdo; a ko ponizini pe ka ovel povazdime.”

*O carstvo e Devlesoroi okolenđe kolaj ponizna sar o čhavore*

*(Mt 19,13-15; Mk 10,13-16)*

15 O manuša anena ine anglo Isus pumare tikore čhavoren te čhivel ple vasta upro lende. I kad o učenici dikhle adava, braninde lende.

16 Ali o Isus vičindā len angla peste vačerindoj e učenikonende: "Muken e čhavoren te aven kora mande hem ma braninen lende, adalese so esavkenđe pripadini o carstvo e Devlesoro!"

17 Čače vačerava tumende, ko na primini o carstvo e Devlesoro sar o čhavoro, naka đerdini ano leste."

*Pharoi e barvalende te đerdinen ko carstvo e Devlesoro*

*(Mt 19,16-30; Mk 10,17-31)*

18 I nesavo šerutno e jevrejengoro pučlja e Isuse: "Učitelju šukareja, so valjani te ćerav te dobinav o večno dživdipe?"

19 A o Isus phenđa lese: "Sose vičineja man šukareja? Samoi jekh šukar - o Devel.

20 O naredbe džane: 'Ma ćer preljuba!', 'Ma mudar!', 'Ma čor!', 'Ma svedočin hovavne!', 'Poštujin te dade hem te daja!' "

21 Tegani o šerutno phenđa: "Sa adava ićerava pana taro tikoripe."

22 Ko adava, o Isus phenđa lese: "Pana jekh ačhola tut te ćere: biknin sa so isi tut, a o pare de e čororende i ka ovel tut barvalipe ano nebo. Tegani ava hem phir pala mande."

23 A ov kad šunđa adava, rastužisalo adalese so na manglja te biknel plo baro barvalipe.

24 A kad dikhlja le o Isus sar rastužisalo, phenđa: "Kobori pharo e barvalende te đerdinen ko carstvo e Devlesoro!"

25 Po lokhei e kamilaće te nakhel maškaro kan e suvjakoro nego e barvalse te đerdini ko carstvo e Devlesoro."

26 A o manuša kola šunde adava, phenđe: "Ko onda šaj te ovel spasime?"

27 A o Isus phenđa lende: "So nane moguće e manušenje, mogući e Devlese."

28 O Petar phenđa: "Ače, amen sa ačhavđam te dža pala tute."

29 A o Isus phenđa lende: "Čače vačerava tumende, svako kova ačhavđa plo čher, ili e romnja, ili e phraljen, ili e dade hem e daja, ili e čhaven zbog o carstvo e Devlesoro,

30 ka primini po više ko akava sveto adalestar so ačhavđa hem ka primini o večno dživdipe ko sveto savo avela."

*O Isus trito puti vaćeri ple meribnastar*  
*(Mt 20,17-19; Mk 10,32-34)*

31 O Isus cidindā pe e dešu duje aposto-lencar ki strana hem phenđa lende: "Ače, džaja nakoro Jerusalim. Adari ka pherđol sa adava so o proroci pisinde ano Sveto lil mandar, e Manušesere Čhvestar.

32 Ka den man ko manuša kola nane Jevreja. On ka maren muj mancar, ka vređinen man hem ka čhungaren man.

33 Ka šibinen man hem ka mudaren man, ali o trito dive ka uštav taro mule."

34 O učenici na halile ništa adalestar so o Isus vaćerđa lende. O značenje adale lafengoro inele garavdo olendar, i na džande sostar o Isus vaćeri.

*O Isus sasljari e korore prosjako*  
*(Mt 20,29-34; Mk 10,46-52)*

35 Kad o Isus alo paše uzali diz Jerihon, uzalo drom bešela ine nesavo kororo manuš hem prosini.

36 Kad o kororo manuš šunđa sar o narodo nakhela, raspučlja pe soi adava.

37 I phenđe lese so o Isus o Nazarećanin nakhela.

38 Tegani o kororo vičindā: "Isuse, Čhaveja Davidesereja, smilujin tut maje!"

39 A o manuša kola phirde anglo Isus vičinde upro leste te traīni, ali ov pana po zorale vičindā: "Čhaveja Davidesereja, smilujin tut maje!"

40 Tegani o Isus terdino hem naredindā te anen e korore anglo leste. I kad ande le, o Isus pučlja le:

41 "So mangeja te ćerav će?"

A o kororo phenđa: "Gospode, mangava te dikhav."

42 I o Isus phenđa lese: "Dikh! Ti vera sasljarđa tut."

43 I otojekhvar o kororo šaj ine te dikhel hem lelja te džal palo Isus slavindoj e Devle. I sa o manuša kola dikhle adava zahvalinde e Devlese.

## 19

### *O Isus džala koro Zakej o cariniko*

<sup>1</sup> O Isus đerdinđa ani diz Jerihon. I sar nakhela ine maškari diz,

<sup>2</sup> alo nesavo manuš palo anav Zakej te dikhel le. O Zakej inele jekh taro šerutne e carinikonengere ani diz hem inele barvalo.

<sup>3</sup> Ov pokušinđa te dikhel koi adava o Isus, ali našti ine taro narodo adalese so inele pretičkoro.

<sup>4</sup> Adalese prastandilo po anglal hem uklinđa upro e smokvakoro kaš te šaj dikhel e Isuse adalese so džanđa da valjani te nakhel adathar.

<sup>5</sup> A kad o Isus reslo adari, dikhlja upre hem phenđa lese: "Zakej, hulji sigate! Avdive valjani te ovav ano to čher."

<sup>6</sup> I o Zakej huljilo sigate hem radosno priminđa le pese ano čher.

<sup>7</sup> Sa o manuša kola dikhle adava, lelje te gundinen, vačerindoj: "Dželo koro grešniko te bešel."

<sup>8</sup> A o Zakej terdino hem phenđa e Gospodese e Isuses: "Ače, Gospode, ekvaš oto barvalipe mlo ka dav e čororende, a te nekas hovavđum, ka irinav lese štar puti više."

<sup>9</sup> A ko adava, o Isus phenđa lese: "Avdive alo o spasenje ano akava čher, adalese soi hem akava manuš potomko e Avraamesoro.

<sup>10</sup> Adalese so, me, o Čhavo e manušesoro, aljum te rodav hem te spasinav e našalden!"

### *I priča oto poverime pare (Mt 25,14-30)*

<sup>11</sup> I sar but manuša šunena ine e Isuse, ov vačerđa lenđe hem akaja priča, adalese so inele paše uzalo Jerusalem, a on mislinde da o carstvo e Devlesoro otojekhvar ka mothoj pe.

<sup>12</sup> Phenđa: "Inele jekh ugledno manuš kova spremisalo te džal ki durutni phuv te ovel čhivdo zako caro, a palo adava te irini pe čhere.

<sup>13</sup> I vičinđa ple deše slugen, dinđa len po ekvaš kilo srebro hem phenđa lenđe: "Zaradinen maje ađahar so ka ćeren buti

adaleja đikote na avava.' I dželo ko drom.

<sup>14</sup> A o manuša oti lesiri phuv mrzinde le, i bičhalde pumare manušen adari kaj ov dželo te phenen: 'Na mangaja akale te ovel amaro caro.'

<sup>15</sup> Kad o ugledno manuš irinđa pe sar caro, naredinđa te vičinen koro leste okole slugen, kolende dinđa pare, te dikhel kobor zaradinde lese.

<sup>16</sup> O prvo sluga alo vačerindoj: 'Gospodarona, oto adava so dinđan man, ćerđum deš puti više.'

<sup>17</sup> I ov phenđa lese: 'But šukar. Tu injan šukar sluga! Adalese so injanle maje verno ko najhari, ka dav tut te vladine upro deš dizja!'

<sup>18</sup> O dujto sluga alo vačerindoj: 'Gospodarona, oto adava so dinđan man, ćerđum pandž puti više.'

<sup>19</sup> I lese phenđa: 'Ka dav tut te vladine upro pandž dizja!'

<sup>20</sup> O trito sluga alo vačerindoj: 'Gospodarona, ače to srebro savo dinđan man. Garavđum le ano jekh kotor e šejengoro.

<sup>21</sup> Ćerđum ađahar adalese so darandiljum tutar so injan strogo manuš. Leja okova so nane klo hem čedeja kaj na sejindan.'

<sup>22</sup> A ov phenđa lese: 'Tu injan bišukar sluga! Palo te lafija ka sudinav tut. Te džanđan so injum strogo manuš, da lava okova so nane mlo hem čedava so na sejindum,

<sup>23</sup> sose onda na dinđan mle pare ki kamata? Ći akana ka ovel man ine više pare save ka lav ine avindoj čhere.'

<sup>24</sup> Tegani phenđa okolende kola terdine uzalo leste: 'Len akale slugastar o srebro hem den le okolese kas isi deš puti edobor!'

<sup>25</sup> A on phende lese: 'Ali, gospodarona, ole već isi pandž kilja srebro.'

<sup>26</sup> Ov phenđa: 'Dikhena da svakone kas isi, ka del pe lese pana, a okole kas nane ka lel pe lestar hem adava so isi le.

<sup>27</sup> A okole mle neprijatelj, so na mangle te ovav lengoro caro, anen akari hem čhinen len angla mande!'"

*O manuša ano Jerusalim dena čast e Isusesse sar carose*  
(Mt 21,1-11; Mk 11,1-11; Jn 12,12-19)

<sup>28</sup> I kad vačerđa lenđe adava, o Isus nastavinda plo drom nakoro Jerusalim.

<sup>29</sup> Kad alo paše uzalo gava Vitfaga hem Vitanija, uzali gora vičimi e Maslinakiri, bičhalđa duje učenikonen

<sup>30</sup> vačerindoj: “Džan ko adava gav savoi angla tumende. I kad ka đerdinen, ka arakhen phandle terne here upro saveste pana nijekh manuš na beštino. Phraven le hem anen le akari.

<sup>31</sup> Te neko pučlja tumen: ‘Sose phravena le?’, phenen lese: ‘E Gospodese valjani.’ ”

<sup>32</sup> On dže le hem arakhle ađahar sar so phenda lenđe o Isus.

<sup>33</sup> I sar phravena ine e terne here, o manuša, kasoro inele o terno her, pučle len: “Sose phravena e terne here?”

<sup>34</sup> A on phende: “E Gospodese valjani.”

<sup>35</sup> I ande e here anglo Isus. Čivde pumare fostanja upro her hem bešljarde e Isuse upro leste.

<sup>36</sup> I sar džala ine anglal bešindoj upro her, o manuša buljarena ine pumare fostanja upro drom anglo leste.

<sup>37</sup> A kad alo paše uzalo than kotar huljela pe ine tari e Maslinakiri gora, sa o učenci so inele adari lelje radosno hem oto sa o glaso te slavinen e Devle zako sa o čudesija save dikhle,

<sup>38</sup> vačerindoj:

“Blagoslovime o Caro

kova avela ano anav e Gospodesoro!

Nek ovel mir ano nebo

hem slava e Devlese ko učipe!”

<sup>39</sup> Tegani nesave fariseja, kola inele maškaro lenđe, phende e Isusesse: “Učitelju, phen te učenikonenđe te na vačeren adava.”

<sup>40</sup> A o Isus phenda lenđe: “Phenava tumenđe, te trainde on, o bara ka vičinen.”

*E Isusesei phare zako Jerusalim*

<sup>41</sup> I kad o Isus alo paše uzalo Jerusalim, dikhindoj i diz, runđa laće

<sup>42</sup> vačerindoj: “Oh, te džane ine avdive hem tu so anela će mir! Ali adavai akana garavdo te jačendar.

<sup>43</sup> Ka aven o dive kad te neprijateljka ka čiven će barikade, ka opkolinen tut hem taro sa o strane ka pritiskinen tut.

<sup>44</sup> Ka uništinen hem tut hem te dizuten. Naka ačhaven ni bar upro bar adalese so na pendžardan o vreme kad o Devel alo te spasini tut.”

*O Isus na mukela te biknel pe ano Hram*  
(Mt 21,12-17; Mk 11,15-19; Jn 13-22)

<sup>45</sup> Kad o Isus alo ano Jerusalim, đerdinda ano boro e hramesoro hem lelja te ispuđini adathar okolen so biknena.

<sup>46</sup> Phenda lenđe: “Pisimei ano Sveto lil: ‘O čher mlo ka ovel čher zaki molitva’, a tumen čerđen olestar ‘than kote čedena pe o čora!’ ”

<sup>47</sup> I taro dive ko dive, o Isus sikavđa e manušen ano boro e hramesoro. A o šerutne sveštenici hem o učitelja e Zakonestar zajedno e jevrejengere starešinenčar rodena ine sar te čeren o Isus te ovel mudardo,

<sup>48</sup> ali na arakhle sar adava te čeren, adalese so sa o manuša pažljivo šunena ine lesoro sikaviba.

## 20

*E Jevrejengere vođe na prihvatinena e Isusesoro autoritet*  
(Mt 21,23-27; Mk 11,27-33)

<sup>1</sup> I jekhvar sar o Isus sikaj ine e manušen ano boro e Hramesoro hem vačeri lenđe ine o Šukar lafi, ale uzalo leste o šerutne sveštenici, o učitelja e Zakonestar hem o starešine

<sup>2</sup> hem pučle le: “Vačer amende kotar tuće autoritet te čere akava? Ko dinda tut pravo?”

<sup>3</sup> O Isus phenda lenđe: “Hem me tumen ka pučav nešto. Vačeren maje:

<sup>4</sup> Ko dinda pravo e Jovane te krstini e manušen, o Devel kovai ano nebo ili o manuša?”

<sup>5</sup> A on raspravinde pe maškara pumende vačerindoj: “Te phenda ‘o Devel kovai ano nebo’, ov ka pučel amen sose onda na verujindam lese.

<sup>6</sup> A te phenda ‘o manuša’, sa o manuša ka mudaren amen barencar,

adalese soi uverime da o Jovan inele proroko.”

7 Adalese phende e Isusese: “Na džanaja ko dinda pravo e Jovane.”

8 I o Isus phenda lende: “Ni me onda naka phenav tumende kotar maje pravo akava te cerav.”

*I priča oto bišukar vinogradarija  
(Mt 21,33-46; Mk 12,1-12)*

9 Tegani o Isus lelja te vaćeri e narodose akaja priča: “Nesavo manuš sadinda vinograd, iznajminda le nesave vinogradarende hem dželo ko drom ko but vreme.

10 I kad alo o vreme te čeden pe o drakha, bičhalđa e sluga koro vinogradarija te šaj den le oto bijandipe e drakhakoro. Ali o vinogradarija marde le hem bičhalde le palal čuće vastencar.

11 I o gospodari bičhalđa avere sluga. Ali on hem ole marde, lađarde le hem bičhalde le palal čuće vastencar.

12 I palem o gospodari bičhalđa koro lende hem e tritone sluga. A on čerde le ko rata hem frdinde le avri taro vinograd.

13 Tegani o gospodari oto vinograd phenda: ‘So te cerav? Ka bičhalav lende mle volime čhave. Šaj ole ka pošujinen.’

14 Ali kad o vinogradarija dikhle le, vaćerde maškara pumende: ‘Akavai o nasledniko. Hajde te mudara le hem amende te ačhol o nasledstvo.’

15 I frdinde le avri taro vinograd hem mudarde le.

So mislinena, so ka čerel o gospodari adale vinogradarende?

16 Ka avel hem ka mudari len, a o vinograd ka iznajmini averende.”

I okola kola šunde adaja priča, phende: “Te na del o Devel adava te ovel!”

17 A o Isus dikhlja ano lende hem phenda: “A so onda znaćini adava soi pisime ano Sveto lil:

‘O bar savo odbacinde o zidarija ulo najbitno bar e čheresoro?’

18 Svako kova perela upro adava bar, ka phagel pe, a te pelo adava bar upra nekaste, ka zgnječini le.”

19 A o učitelja e Zakonestar hem o šerutne sveštenici mangle tegani te dolen e Isuse, adalese so džande da akaja priča vaćeri olendar, ali darandile e narodostar.

*E verakere vođe našti te dolen e Isuse ko bišukar lafi*

*(Mt 22,15-22; Mk 12,13-17)*

20 A o učitelja e Zakonestar hem o šerutne sveštenici posmatrinena ine e Isuse. Bičhalde koro leste špijunen, kola čerde pe dai iskrena, sar te dolen le ko bišukar lafi i te šaj preden le ko upravniko e rimesoro te osudini le.

21 I o špijunja puće e Isuse: “Učitelju, džanaja da vaćereja hem sikaveja šukar hem na dikheja kovai kova, nego čačimase sikaveja oto drom e Devlesoro.

22 Valjani li amen o Jevreja te platina o porez e rimesere carose ili na?”

23 A o Isus džanda so on mangle te prevarinen le i phenda lende:

24 “Mothoven maje i kovanica savaja platinena o porez. Kasiri slika hem kasoro anav isi la?”

A on phende: “E carosoro.”

25 Tegani o Isus phenda lende: “Onda den soi e carosoro e carose, a soi e Devlesoro e Devlese.”

26 I ađahar o špijunja našti ine te arakhen ništa bišukar ano okova so o Isus vaćerđa i trainde adalese so inele zadivime lesere vaćeribnaja.

*O sadukeja pućena e Isuse zako uštiba taro mule*

*(Mt 22,23-33; Mk 12,18-27)*

27 I ale koro Isus nesave sadukeja kola vaćerena da nane uštiba taro mule, i puće e Isuse:

28 “Učitelju, o Mojsije pisinda amende so te čerel o manuš te mulo lesoro phral kova pala peste ačhavđa romnja bizo čhave. Adava manuš valjani te lel ple phralesere romnja te šaj oj te bijani čhave kova ka ovel nasledniko e mulesoro.

29 Ađahar, inele eфта phralja. O prvo lelja romnja i mulo, a na ačhavđa pala peste čhaven.

30 O dujto phral lelja ple phralesere romnja, ali hem ov mulo.

<sup>31</sup> Tegani o trito phral lelja adala romnja i mulo hem ađahar sa o efta phralja. I nijekh olendar na ačhavđa čhaven pala peste.

<sup>32</sup> Ko kraj muli hem i romni.

<sup>33</sup> Kasiri onda romni oj ka ovel kad ka uštel pe taro mule, a inele dindi ko sa o efta phralja?"

<sup>34</sup> O Isus phenđa lende: "O manuša ko akava sveto lena pe hem dena pe.

<sup>35</sup> A okola kolen o Devel smatrini dai dostojna te oven vazdime taro mule hem te živinen ko sveto savo avela, ni ka len pe ni ka den pe.

<sup>36</sup> Adalese so našti više ni te meren: ka oven sar o anđelja. Oni čhave e Devlesere, adalese so o Devel ka vazdel len taro mule.

<sup>37</sup> A da o mule uštena, mothovđa hem o Mojsije ano Sveto lil kote pisini oto grmo savo ine thabljola. Adathe ov zako Gospod phenela dai 'Devel e Avraamesoro, e Isaakesoro hem e Jakovesoro' iako on tegani inele mule.

<sup>38</sup> A o Devel nane Devel e mulengoro, nego Devel e dživdengoro. Adalese soi on e Devlese pana dživde."

<sup>39</sup> Nesave učitelja e Zakonestar phende e Isuse: "Učitelju, šukar vačerđan!"

<sup>40</sup> I nijekh više na tromandilo te pučel le nešto.

*O Hrist po baroi e carostar e Davidestar (Mt 22,41-46; Mk 12,35-37)*

<sup>41</sup> Tegani o Isus pučlja okolen so šunena le ine: "Sar šaj te vačeri pe dai o Hrist samo e Davidesoro čhavo?"

<sup>42</sup> A korkoro o David phenela ano lil oto Psalmija:

'O Gospod phenđa mle Gospodese:

Beš ko počasno than, oti mli desno strana,

<sup>43</sup> đikote na pašjarava te neprijatelj-talo te pre!"

<sup>44</sup> Te o David vičini le 'Gospode', sar onda o Hrist šaj te ovel samo lesoro čhavo?"

*O Isus upozorini ple učenikonen upro učitelja e Zakonestar*

*(Mt 23,1-36; Mk 12,38-40; Lk 11,37-54)*

<sup>45</sup> Tegani anglo sa o manuša, o Isus phenđa ple učenikonende:

<sup>46</sup> "Arakhen tumen e učiteljendar e Zakonestar! On volinena te phiren urjavde ano bare fostanja hem o manuša, ano baro poštujiba, te pozdravinen len ko trgija. Volinena te bešen ko anglune thana ano sinagoge hem ko najšukar thana ko gozbe.

<sup>47</sup> Hana o imanje e udovicengoro hem čerena pe dai pobožna ađahar so molinena bare molitve. On ka oven po zorale kaznime nego avera manuša."

## 21

*I čorori udovica dela sa so isi la (Mk 12,41-44)*

<sup>1</sup> Na nakhlo but palo adava, o Isus vazdinda plo šero hem dikhlja sar o barvale manuša čhivena pumare pare ani e hramesiri kutija zako čediba.

<sup>2</sup> Ađahar dikhlja hem jekha čorora udovica sar čhivela samo duj najtikore kovanice.

<sup>3</sup> Tegani phenđa: "Čače vačerava tumende, akaja čorori udovica čhivđa više sarijendar.

<sup>4</sup> Adalese so sare akala dinde oto buderi so isi len, a oj, kojai čorori, dinda sa so inola zako živiba."

*O Hram ka ovel peravdo hem o znakija oto bare nevolje*

*(Mt 24,1-14; Mk 13,1-13)*

<sup>5</sup> I sar nesave učenici vačerena ine adalestar sari o Hram šukar ukrasime šuže bare barencar hem e daronencar savei posvetime e Devlese, o Isus phenđa:

<sup>6</sup> "Ka avel o dive kad oto sa akava so dikhena naka ačhol ni bar upro bar. Svako ka ovel peravdo."

<sup>7</sup> I on pučle e Isuse: "Učitelju, kad adava ka ovel? Savo znako ka mothoj amende da ka ovel adava?"

<sup>8</sup> A o Isus phenđa: "Dikhen te na oven hovavde. Adalese so but džene ka aven ano mlo anav vačerindoj: 'Me injum o Hrist' hem: 'Alo paše o kraj akale vremesoro.' Ma džan palo lende!

<sup>9</sup> A kad šunena zako mariba hem zako pobune, ma te daran. Adalese so prvo



adava valjani te ovel, ali nane odmah o kraj.”

<sup>10</sup> Tegani phenđa lenđe: “Jekh nacija ka uštel upri aver nacija hem jekh carstvo upro aver carstvo.

<sup>11</sup> Ko but thana ka oven bare zemljotresija, bokhalipe hem zaraze. Ka mothoven pe čudesna znakija ko nebo savendar o manuša ka daran.

<sup>12</sup> Ali angleder so sa adava te ovel, ka dolen tumen hem ka progoninen tumen, ka legaren tumen ko sudo ano sinagoge hem ko phandlipe, ka legaren tumen anglo carija hem anglo vladarija, hem sa adava zbog mande.

<sup>13</sup> Adava ka ovel tumenđe te šaj sve-dočinen lenđe mandar.

<sup>14</sup> Adalese zapamtinen: ma pripreminen tumen angleder save lafencar ka braninen tumen.

<sup>15</sup> Adalese so me ka dav tumen mudrost hem lafija ko save nijekh tumaro protivniko naka šaj te irini lafi.

<sup>16</sup> A ka izdajinen tumen čak hem tumare dada hem o daja, tumare phralja, tumari familija hem tumare amala; hem nesaven tumendar ka mudaren.

<sup>17</sup> I sare ka mrzinen tumen zbog mande,

<sup>18</sup> ali nijekh bal tumare šerestar naka perel.

<sup>19</sup> Adaleja so ka ačhoven verna, ka dobinen o večno dživdipe.”

*O Isus vaćeri so o Jerusalem ka ovel uništite*

*(Mt 24,15-21; Mk 13,14-19)*

<sup>20</sup> O Isus phenđa hem akava: “I kad ka dikhen sar o Jerusalem opkolime e vojskendar, te džanen da alo lesoro vreme te ovel uništite.

<sup>21</sup> Tegani okola kola živinena ani e judejakiri regija nek našen ko gore. Okola kola živinena ano Jerusalem nek ikljon avri, a kolai ko polje, te na đerdinen ani diz.

<sup>22</sup> Adalese so adala ka oven o dive oti e Devlesiri kazna, te pherdol sa soi pisime ano Sveto lil.

<sup>23</sup> Jao e khamnjende hem okolende kola dena čući ko adala dive! Adalese so bari nevolja ka ovel upri phuv hem e Devlesiri holi ka perel upro akava narodo.

<sup>24</sup> Nesave olendar ka oven mudarde maćeja, a avera ka oven legarde ko ropstvo maškaro sa o nacije. O Jerusalem ka ovel gazime e manušendar oto avera nacije sa đikote na nakhela lengoro vreme.”

*O znakija save ka mothoven e Isusesoro aviba*

*(Mt 24,23-35; Mk 13,21-31)*

<sup>25</sup> O Isus phenđa hem akava: “I ka oven čudna znakija ko kham, ko masek hem ko čerenja, a ki phuv o nacije naka džanen so te čeren oti dar zbog adava so o more ka čerel glasna zvukija hem bare talasija.

<sup>26</sup> O manuša ka meren oti dar hem oto adžiceriba o bišukaripe savo avela ki phuv, adalese so o zoralipa e nebosere ka oven potresime.

<sup>27</sup> Tegani sare ka dikhen man, e Čhave e manušesere, sar avava upro oblako ano zoralipe hem ani bari slava.

<sup>28</sup> A kad sa adava ka počini te ovel, terđoven ko pre bizi dar hem vazden tumare šere adalese soi paše tumaro spasenje.”

*O Isus vaćeri e učenikonende te pratinen o znakija savendar vaćerđa lenđe*

*(Mt 24,32; Mk 13,28)*

<sup>29</sup> Tegani o Isus phenđa lenđe akaja priča: “Dikhen i smokva ili bilo savo aver kaš.

<sup>30</sup> Kad dikhena da ikljona listija upro leste, korkore džanen dai paše o linaj.

<sup>31</sup> Adahar hem tumen kad dikhena da ovela sa adava, te džanen dai o carstvo e Devlesoro paše.

<sup>32</sup> Čače vaćerava tumenđe, akaja generacija naka nakhel đikote sa adava na ovela.

<sup>33</sup> O nebo hem i phuv ka nakhen, ali mle lafija nikad naka nakhen.”

*O Isus sikaj e učenikonon te oven uvek spremna zako olesoro aviba*

*(Mt 24,36-51; Mk 13,32-37)*

<sup>34</sup> I o Isus phenđa lenđe: “Arakhen tumen te na oven zaokupirime pibnaja, mačojbnaja hem akale dživdipnasere brigencar i te resel tumen otojekhvar adava dive.

<sup>35</sup> Adalese so adava dive ka avel sar zamka upro sa o manuša ki phuv.

<sup>36</sup> Adalese oven džangale hem stalno molinen te šaj nakhaven sa adava so valjani te ovel hem te terđoven anglo Čhavo e manušesoro.”

<sup>37</sup> Diveja o Isus sikaj ine ano Hram, a raćaja ikljola ine tari diz hem džala te nakhaj i rat ki gora vićimi e Maslinakiri.

<sup>38</sup> I sa o manuša rano sabaleja džana ine ko Hram te šunen le.

## 22

*O Juda dogovorini pe te izdajini e Isuse (Mt 26,1-5, 14-16; Mk 14,1-2, 10-11; Jn 11,45-53)*

<sup>1</sup> Avela ine paše o Prazniko e bikvascone marengoro, savo vićini pe Pasha.

<sup>2</sup> O šerutne sveštenici hem o učitelja e Zakonestar rodona ine sar te ćeren o Isus te ovel mudardo, ali darandile e narodostar.

<sup>3</sup> Tegani o Sotoni đerdinđa ano Juda vićime Iskariot kova inele jekh oto dešu duj apostolja e Isusesere.

<sup>4</sup> Ov dželo koro šerutne sveštenici hem koro narednici e hramesere stražakere hem dogovorinđa pe olencar sar te predel lenđe e Isuse.

<sup>5</sup> On ule radosna hem phende e Judase da ka den le pare.

<sup>6</sup> I ov pristaninđa. I ađahar lelja te rodel šukar prilika te izdajini e Isuse kad naka ovel narodo uzalo leste.

*O Isus bićhali duje ućenikonen ko Jerusalim te pripreminen i Pasha*

*(Mt 26,17-25; Mk 14,12-21; Jn 13,21-30)*

<sup>7</sup> Kad alo o prvo dive oto Prazniko e bikvascone marengoro, ko savo valjanđa te žrtvujini pe bakrore zaki Pasha,

<sup>8</sup> o Isus phenđa e Petrese hem e Jovanese: “Džan hem ćeren amende te ha e pashakoro hajba.”

<sup>9</sup> A on phende lese: “Kaj mangeja te ćera le?”

<sup>10</sup> Ov phenđa lenđe: “Šunen. So ka đerdinen ki diz, ka resel tumen jekh manuš kova akhari pani ano khoro. Džan palo leste. Ko čher ko savo ka đerdini

<sup>11</sup> roden e domaćine hem vaćeren lese: ‘O učitelj pućela ki savi soba šaj te hal e pashakoro hajba ple ućenikonencar?’

<sup>12</sup> I ov ka mothoj tumenđe i bari upruni soba savi već pripremime. Adari ćeren amende zako hajba.”

<sup>13</sup> I on dzele hem arakhle sa ađahar sar so phenđa lenđe o Isus i adari ćerde zako hajba e pashakoro.

*O Isus hala i poslednjo večera e ućenikonencar*

*(Mt 26,26-30; Mk 14,22-26; 1. Kor 11,23-25)*

<sup>14</sup> I kad alo o vreme, o Isus čhivđa pe uzalo astali ple apostolencar.

<sup>15</sup> I phenđa lenđe: “Edobor mangljum te hav akaja Pasha tumencar angleder so ka patinav.

<sup>16</sup> Adalese so, vaćerava tumenđe, naka hav la više đikote lakoro čaćikano znaćenje na pherđola ano carstvo e Devlesoro.”

<sup>17</sup> Tegani lelja i čaša e moljaja, zahvalinđa e Devlese hem phenđa e apostolende: “Len akaja mol hem podelinen la maškara tumende.

<sup>18</sup> Adalese so, vaćerava tumenđe, naka pijav više mol đikote o carstvo e Devlesoro na avela.”

<sup>19</sup> I lelja o maro, zahvalinđa e Devlese, phaglja le hem dinđa le e apostolende vaćerindoj: “Akavai mlo telo savo dela pe zako tumenđe. Ćeren akava te setinen tumen mandar.”

<sup>20</sup> Ađahar lelja hem i čaša e moljaja pali večera hem phenđa: “Akaja čaša e moljaja nevoi savez ano mlo rat savo čhorela pe tumenđe.

<sup>21</sup> Ali aće, o manuš kova ka izdajini man mančari uzalo astali.

<sup>22</sup> Adalese so, me, o Čhavo e manušesoro, valjani te merav sar soi odredime, ali jao okole manušese kova ka izdajini man!”

<sup>23</sup> I o apostolja lelje te pućen pe maškara pumende kova olendar šaj te ovel adava so ka ćerel ađahar nešto.

*Najbaroi okova kova kandela*

<sup>24</sup> I o ućenici lelje te raspravinen pe kovai olendar najbaro.

25 A o Isus phenða lenđe: “Avere nacijengere carija vladinena upro lende hem o vladarija lengere pumen vičinena ‘manuša kola čerena šukaripe’.

26 Ali tumen ma oven esavke! Nego, o najbaro maškar tumende nek ovel sar najtikoro, a o vođa nek ovel sar sluga.

27 A kovai po baro? Okova kovai uzalo astali ili okova kova kandela le? Na li okova kovai uzalo astali? A me maškara tumende injum sar okova kova kandela.

28 Tumen injen adala kola ačhile mancar ano mle iskušnja.

29 I me dava tumen te vladinen ano carstvo, sar so mlo Dad dinda man:

30 te han hem te pijen maje uzalo astali ano carstvo mlo, hem te bešen ko tronja te sudinen upro dešu duj plemija e Izraelesere.”

*O Isus vačeri so o Petar ka odreknini pe olestar*

*(Mt 26,31-35; Mk 14,27-31; Jn 13,36-38)*

31 O Isus phenða: “Simone, Simone, ače o Sotoni rodinða e Devlestar te iskušini tumen sar kad neko čorela o điv maškari sita.

32 Ali me molinđum tuće te na našale ti vera. Adalese, kad palem ka irine tut mande, zorjar te phraljen.”

33 A ov phenða lese: “Gospode, injum spremno te džav tuja hem ko phandlipe hem ko meriba.”

34 A o Isus phenða: “Vačerava će, Petre, o bašno naka đilabi avdive đikote trin puti naka hovave da na pendžareja man.”

35 I phenða e apostolende: “Kad bičhalđum tumen ko drom bizo kese e parencar, bizo torbe hem bizi buderi obuća, na li falinða tumende nešto?”

A on phende: “Ništa.”

36 Tegani o Isus phenða lenđe: “Ali akana kas isi kesa e parencar, nek lel la! Ađahar hem i torba! A kas nane mači, nek biknel plo ogrtači hem nek činelfse jekh.

37 Adalese so, vačerava tumende, valjani te pherđol adava soi mandar pisime ano Sveto lil:

‘Dikhle le sar jekhe zločinco.’

Čače, pherđola sa soi pisime mandar.”

38 A on phende: “Gospode, ače isi amen duj mačija!”

A ov phenða: “Šukari!”

*O Isus molini pe ki e Maslinakiri gora*  
*(Mt 26,36-46; Mk 14,32-42)*

39 I iklindoj adathar, palo plo adeti, dželo ki e Maslinakiri gora. Oleja džeze hem lesere učenicu.

40 I kad resle adari, phenða lenđe: “Molinen tumen te na peren ano iskušnje!”

41 I cidinða pe olendar, edobor kobor šaj te frdel pe o bar, pelo ko kočija hem molinða pe e Devlese,

42 vačerindoj: “Dade! Te mangeja, cide akaja čaša e patnjaja mandar. Ali, nek ovel pali ti volja, a na pali mli.”

43 Tegani o anđeo mothovđa pe lese taro nebo hem hrabrinda le.

44 A kad inele ani po bari patnja, po zorale molinða pe. Lesoro znoj ulo sar kapke oto rat save perena ine upri phuv.\*

45 I pali molitva uštino, alo đi ple učenicu hem arakhlja len sar sovena adalese so inele umorna oto tugujiba.

46 Tegani pučlja len: “Sose sovena? Ušten hem molinen tumen te na peren ano iskušnje!”

*O Isus izdajime hem dolime*

*(Mt 26,47-56; Mk 14,43-50; Jn 18,3-11)*

47 Sar pana o Isus vačeri ine adava, ale nakoro leste but manuša kolen anda o Juda kova inele jekh oto dešu duj apostolja. Ov alo koro Isus te čumudini le ki čham.

48 A o Isus pučlja le: “Judo, čumudipnaja li izdajineja e Čhave e manušesere?”

49 Kad o učenicu kola inele adari dikhle da o Isus ka ovel dolime, pučle le: “Gospode, te napadina len li mačencar?”

50 I jekh olendar khuvđa mačeja e prvosveštenikosere sluga hem činđa lesoro desno kan.

51 A o Isus phenða ple učenikonende: “Ačhaven tumen adalestar!” I čhivđa plo vas upro lesoro kan hem sasljarda le.

52 Tegani phenða okolende so ale te dolen le, e šerutne sveštenikonende, e

\* 22,44 Ano nesave grčka rukopisija nane o 43. hem o 44. stih.

narednikonenđe e hramesere stražakere hem e starešinende: “Mačencar hem kaštencar aljen pala mande sar palo pobunjeniko.

<sup>53</sup> Divencar injumle tumencar ano Hram, i na dolinde man. Ali akavai tumarom vreme hem o zoralipe e tominakoro vladini.”

*O Petar odreknini pe e Isusestar*

(Mt 26,57-58, 69-75; Mk 14,53-54, 66-72; Jn 18,12-18, 25-27)

<sup>54</sup> I dolinde e Isuse hem adathar legarde le ko čher e prvosveštenikosoro. A o Petar odural džala ine palo lende.

<sup>55</sup> Kad tharde jag ko maškar e borosoro hem beštine uzalo late, hem o Petar beštino olencar.

<sup>56</sup> I nesavi sluškinja dikhlja le sar bešela uzali jag, i dikhlja po šukar ano leste hem phenđa: “I akava inele oleja!”

<sup>57</sup> A o Petar hovavđa vačerindoj: “Đuvlije, na pendžarava le!”

<sup>58</sup> Na nakhlo but palo adava, dikhlja le nesavo aver manuš hem phenđa: “I tu injan jekh olendar!”

A o Petar phenđa: “Manušeja, na injum!”

<sup>59</sup> I kad nakhlo di sar jekh sati, aver nesavo uporno tvrđinda: “Čače akava inele oleja, adalese soi hem ov Galilejco!”

<sup>60</sup> A o Petar phenđa: “Manušeja, na džanav sostar vačereja!”

I odmah, sar pana vačeri ine, o bašno đilabđa.

<sup>61</sup> Tegani o Gospod Isus irinda pe hem dikhlja ano Petar, a o Petar setinda pe lesere lafendar: “Vačerava će, Petre, angleder so o bašno avdive ka đilabi, trin puti ka hovave da na pendžareja man.”

<sup>62</sup> I o Petar iklilo taro boro hem zorale runđa.

*O čuvarija marena muj e Isuseja*

(Mt 26,67-68; Mk 14,65)

<sup>63</sup> O čuvarija lelje te maren muj e Isuseja hem te maren le.

<sup>64</sup> Učharde lesere jača hem phende lese: “Prorokujin ko khuvđa tut!”

<sup>65</sup> I bute avere lafencar vredinena ine e Isuse.

*E verakere hem e narodosere vođe rodona krivica upro Isus*

(Mt 26,59-66; Mk 14,55-64; Jn 18,19-24)

<sup>66</sup> Kad dislilo, čedinde pe o starešine e jevrejengere, o šerutne sveštenici hem o učitelja e Zakonestar, ande e Isuse pumende ko sabor, ko Sinedrion,

<sup>67</sup> hem phende lese: “Te injan tu o Hrist, phen amende!” A ov phenđa lende:

“Te phenđum tumende, naka verujin;

<sup>68</sup> a te pučljum tumen, naka odgovorinen.

<sup>69</sup> Ali od akana me, o Čhavo e manušesoro, ka bešav ko počasno than, oti desno strana oto zoralipe e Devlesoro.”

<sup>70</sup> A on sare pučle e Isuse: “Znači tu injan o Čhavo e Devlesoro?”

A ov phenđa lende: “Ađahari sar so phenena: Me injum.”

<sup>71</sup> Tegani on phende: “Na valjani amende više avera svedoci. Sare amen šundam da korkoro pes osudinda!”

## 23

*E jevrejengere vođe optužinena e Isuse ko Pilat*

(Mt 27,1-2, 11-14; Mk 15,1-5; Jn 18,28-38)

<sup>1</sup> Tegani sare kola inele ko sabor uštine hem legarde e Isuse koro Pilat, koro upravniko e rimesoro,

<sup>2</sup> hem lelje te vačeren protiv oleste: “Akale manuše arakhljam sar zavodini amare narodo hem vačeri lende te na platinen o porez e carose, a pese vačeri dai o Hrist, o caro.”

<sup>3</sup> Tegani o Pilat pučlja e Isuse: “Tu li injan o caro e Jevrejengoro?”

A o Isus phenđa: “Ađahari sar so pheneja.”

<sup>4</sup> Tegani o Pilat phenđa e šerutne sveštenikonende hem e narodose: “Na arakhava nisavi krivica upro akava manuš!”

<sup>5</sup> Ali on na ačhavde te vičinen: “Ple sikavibnaja vazdela pobuna maškaro manuša ki sa i phuv e Jevrejengiri. Lelja te čerel adava ani regija Galileja hem alo čak di akate ani diz Jerusalem!”

### *O Isus anglo Irod*

<sup>6</sup> A kad o Pilat šunđa adava, pučlja len nane li o Isus Galilejco.

<sup>7</sup> I kad phende lese dai o Isus Galilejco, o Pilat bičhalđa le koro Irod, kova vladinđa ani Galileja. A baš adala dive o Irod inele ano Jerusolim.

<sup>8</sup> Kad o Irod dikhlja e Isuse, but inele radosno adalese so pana angleder manglja te dikhel le adalese so but šunđa olestar hem nadinđa pe da o Isus ka čerel nesavo čudo anglo leste.

<sup>9</sup> But so pučlja le, ali o Isus ništa na phenđa lese.

<sup>10</sup> A adari terđona ine o šerutne sveštenici hem o učitelja e Zakonestar vačerindoj zorale protiv o Isus.

<sup>11</sup> A o Irod hem lesere vojnici ponizinde e Isuse hem marde muj oleja. Urjavde le ano carikano fostani hem tegani o Irod bičhalđa le palal koro Pilat.

<sup>12</sup> Angleder o Irod hem o Pilat na inele ano šukar odnosija, a adava dive ule amala.

### *O Pilat osudini e Isuse ko meriba*

*(Mt 27,15-26; Mk 15,6-15; Jn 18,39-19,16)*

<sup>13</sup> A o Pilat vičinđa kora peste e šerutne sveštenikonen, e vođen hem e narodo,

<sup>14</sup> i phenđa lenđe: "Anđen kora mande akale manuše vačerindoj da vazdela pobuna maškaro narodo. Ače, angla tumende pučljum le adalestar, ali na arakhljum nisavi krivica zaki savi tumen optužinena le.

<sup>15</sup> A ni o Irod na arakhlja upro leste krivica i adalese bičhalđa le palal kora amende. Akava manuš na čerđa ništa so zaslužini meriba.

<sup>16</sup> Adalese samo ka naredinav te šibinen le, i ka mukav le."

<sup>17</sup> [A valjanđa zako prazniko, palo adeti, te mukel lenđe jekhe phandle manuše.]

<sup>18</sup> Ko adava sare so inele adari vičinde: "Mudar adale manuše, a muk amende e Varava!"

<sup>19</sup> (O Varava inele phandlo adalese so učestvujinđa ani pobuna savi inele ano Jerusolim hem adalese so mudarđa nekas.)

<sup>20</sup> A o Pilat, adalese so manglja te mukel e Isuse, palem vačerđa olenar,

<sup>21</sup> ali on vičinde: "Čhiv le ko krsto! Čhiv le ko krsto!"

<sup>22</sup> A o Pilat palo trito puti phenđa lenđe: "A savo bišukaripe čerđa akava manuš? Na dikhava sose valjani te merel. Ka naredinav te šibinen le, i ka mukav le."

<sup>23</sup> Ali on na ačhavde te vičinen oto sa o glaso rodindoj te čhivel e Isuse ko krsto. I lengoro vičiba inele sa po zoralo.

<sup>24</sup> I adalese o Pilat odlučinđa te del len adava so mangena.

<sup>25</sup> Muklja okole kole mangle, kova inele phandlo zbog i pobuna hem zbog o mudariba, a e Isuse dinđa ko vojnici te čeren oleja adava so o narodo manglja.

### *E Isuse čhivena ko krsto*

*(Mt 27,32-44; Mk 15,21-32; Jn 19,17-27)*

<sup>26</sup> Sar o vojnici legarena ine e Isuse, dolinde nesave Simone tari Kirinija sar avela ine taro polje. Čhivde o krsto upro leste hem terinde le te akhari le palo Isus.

<sup>27</sup> Palo Isus dželo baro narodo maškaro kolende inele hem o đuvlja kola runde hem žalinde le.

<sup>28</sup> Ali o Isus irinđa pe nakoro lende hem phenđa lenđe: "Đuvljalen taro Jerusolim, ma roven pala mande, nego roven pala tumende hem tumare čhavende.

<sup>29</sup> Adalese so, ače, avena o dive kad o manuša ka vačeren: 'Bahtalei o đuvlja kolai bizo čhave, kola na bijande hem na dinde čuči.'

<sup>30</sup> Tegani

'ka phenen e planinende: Peren upra amende!  
hem e bregonende: Učharen amen!'

<sup>31</sup> Adalese so, te ađahar čerela pe mancar kova injum sar jekh sapano kaš, sigurno po bišukar ka čerel pe e manušencar kolai sar o šuke kašta."

<sup>32</sup> A e Isuseja inele legarde pana duje zločinconen te oven mudarde.

<sup>33</sup> I kad resle ko than vičime Kokalo e šeresoro, o vojnici čhivde ko krsto e Isuse hem čhivde adale zločinconen ko avera krstija: jekhe oti lesiri desno, a e dujtone oti lesiri levo strana.

<sup>34</sup> O Isus phenđa: "Dade, oprostini lenđe, adalese so na džanen so čerena!"

Tegani o vojnici frdinde barbuti hem ađahar delinde maškara pumende e Isus-esere šeja.

<sup>35</sup> O narodo terdino adari te dikhelfse, a e jevrejengere vođe marde muj e Isuseja vačerindoj: “Averen spasinda; akana nek spasini korkoro pes tei čače ov o Hrist e Devlesoro, lesoro Izabirime!”

<sup>36</sup> Hem o vojnici marde muj e Isuseja. Ale uzalo leste hem kaninde le ušli mol,

<sup>37</sup> vačerindoj: “Te injan o caro e jevrejengoro, spasin tut!”

<sup>38</sup> A upreder lesoro šero terdino znako kote inele pisime: AKAVAI O CARO E JEVREJENGORO .

<sup>39</sup> Jekh okole zločinconendar vredinda e Isuse vačerindoj: “Te injan o Hrist, sose na spasineja tut hem amen?”

<sup>40</sup> A o dujto zločinco ukorinda adale so vredinda e Isuse: “Sar na daraja e Devlestar? Hem tu injan ađahar osudime sar soi ov.

<sup>41</sup> Amen pravedno injam kaznime zbog amare bišukar buća, a ov na čerđa nisavo bišukaripe.”

<sup>42</sup> Tegani phenđa: “Isuse, setin tut mandar kad ka ave ano to carstvo.”

<sup>43</sup> A o Isus phenđa lese: “Čače vačerava će, avdive ka ove mancar ano raj!”

#### *E Isusesoro meriba*

(Mt 27,45-56; Mk 15,33-41; Jn 19,28-30)

<sup>44</sup> A ko ekvaš o dive, i tomina učarda sa i phuv hem ađahar inele trin saća,

<sup>45</sup> adalese so o kham kalilo. A e hramesiri zavesa pharavdili ko ekvaš.

<sup>46</sup> A o Isus vičinda oto sa o glaso: “Dade, tuće ano vasta mukava o duho mlo!” Kad phenđa adava, muklja pli duša.

<sup>47</sup> A kad e rimesoro kapetani dikhlja so ulo, lelja te slavini e Devle, vačerindoj: “Čače akava manuš inele pravedniko!”

<sup>48</sup> But manuš kola čedinde pe adari te dikhenfse, irindoj čhere khuvena pe ine ko gruda adalese so ine lenđe žao.

<sup>49</sup> A sa e Isusesere amala, đi o đuvlja kola phirde palo leste pana tari Galileja, odural terdine hem dikhle sa adava.

#### *E Isusesoro paruniba*

(Mt 27,57-61; Mk 15,42-47; Jn 19,38-42)

<sup>50-51</sup> A inele jekh manuš palo anav Josif tari Arimateja, diz ani Judeja. Ov inele šukar hem pravedno manuš kova adžičeri ine o carstvo e Devlesoro. Iako inele člano oto e jevrejengoro sabor, na složinda pe adaleja so inele odlučime te roden o Isus te ovel mudardo.

<sup>52</sup> Ov dželo koro Pilat hem rodinda te den le o telo e Isusesoro.

<sup>53</sup> Tegani huljavđa e Isusesoro telo taro krsto, pačarda le čaršaveja hem čivđa le ano grobo savo inele čerdo ano bar, ano savo pana niko na inele čivdo.

<sup>54</sup> Adava dive inele Dive zako pripremiba zako savato savo samo so na ine te avel.

<sup>55</sup> A o đuvlja, kola ale e Isuseja tari Galileja, džeze e Josifeja hem dikhle sar e Isusesoro telo inele čivdo ano grobo.

<sup>56</sup> I irinde pe adari kaj bešena ine hem spreminde o mirisija hem o mastija savencar te makhen e Isusesoro telo. Ali ko savato odmorinde pe poštujindoj i naredba oto Zakoni e Mojsijasoro.

## 24

### *E Isusesoro uštiba taro mule*

(Mt 28,1-10; Mk 16,1-8; Jn 20,1-10)

<sup>1</sup> Rano sabale, ko prvo dive oto kurko, o đuvlja ale ko grobo hem ande o mirisija save spreminde.

<sup>2</sup> I dikhle dai cidime o bar savo inele anglo udar e grobosoro.

<sup>3</sup> Đerdinde andre, ali na arakhle o telo Gospodesoro e Isusesoro.

<sup>4</sup> I sar terđona ine adari zbunime, otojekhvar iklile anglo lende duj manuš ano sjajna šeja.

<sup>5</sup> O đuvlja but darandile hem peravde pumare šere nakori phuv,

a on phende lenđe: “Sose rodna e dživde maškaro mule?”

<sup>6</sup> Ov nane akate. Uštino taro mule! Setinen tumen so vačerđa tumenđe dok pana inele ani Galileja:

<sup>7</sup> ‘Me, o Čhavo e manušesoro, valjani te ovav dindo ano vasta e grešnone manušengere, te ovav čivdo ko krsto, ali o trito dive ka uštav.’ ”

<sup>8</sup> Tegani on setinde pe da o Isus phenđa lenđe adava.

<sup>9</sup> I irinde pe taro grobo palal ki diz te vačeren adava e dešujekhe apostolende hem sarijende averende.

<sup>10</sup> Adala đuvlja inele i Marija Magdalena, i Jovana, i Marija e Jakovesiri daj, hem avera. I on sa adava vačerde e apostolende,

<sup>11</sup> ali o apostolja na verujinde lenđe, adalese so mislinde da sa adava izmislinde.

<sup>12</sup> A o Petar uštino hem prastandilo đi o grobo. Telilo hem dikhlja samo o čaršavi saveja e Isusesoro telo inele pačardo. I irinda pe palal pučindoj pes so ulo adava.

*O Isus mothoj pe duje učenikonende ko drom nakoro Emaus*  
(Mk 16,12-13)

<sup>13</sup> Adava dive duj oto e Isusesere sledbenici džana ine ko gav Emaus, dur taro Jerusolim dešujekh kilometarija.

<sup>14</sup> Odrumal vačerenena ine maškara pumende adalestar so ulo adala dive.

<sup>15</sup> I sar vačerenena ine ađahar, korkoro o Isus alo uzalo lende hem lelja te phirel olencar.

<sup>16</sup> Ali olende na inele muklo te pendžaren le.

<sup>17</sup> O Isus pučlja len: "Sostar vačerenena maškara tumende phirindoj?"

Tegani on terdine, a ko lengere muja dičhili žalost.

<sup>18</sup> Jekh olendar, palo anav Kleopa, phenda lese: "Sar so dičhola, tu injan jedino abandija ano Jerusolim kova na džanel so ulo adari akala dive."

<sup>19</sup> O Isus pučlja len: "So ulo?"

I on phende lese: "Adava so ulo e Isuseja e Nazarećanineja. Ov inele proroko zoralo ano lafija hem ano delja anglo Devel hem anglo sa o narodo.

<sup>20</sup> Ali amare šerutne sveštenici hem amare avera vođe dinde le te ovel osudime ko meriba hem čivde le ko krsto.

<sup>21</sup> Amen nadindam amen dai ov adava kova ka otkupini e Izraelesere narodo. A ače, tritoi dive sar ulo sa adava.

<sup>22</sup> Hem pana zbuninde amen nesave amare đuvlja. Rano sabale dzele ko grobo,

<sup>23</sup> ali na arakhle e Isusesoro telo adari. Ale hem phende amende da dikhle anđelen kola vačerde lenđe dai o Isus dživdo.

<sup>24</sup> Tegani nesave amendar dzele ko grobo hem arakhle ađahar sar so phende o đuvlja. Ali na dikhle e Isuse."

<sup>25</sup> Tegani o Isus phenda lenđe: "O, sar na haljovena? Sosei tumende pharo te verujinen sa adava so o proroci vačerde?"

<sup>26</sup> On prorokujinde da o Hrist valjani te nakhel sa adala patnje angleder so đerdini pese ani slava."

<sup>27</sup> I tegani lelja te objasnini lenđe soi e Hristestar pisime ano Sveta lila, počindoj e Mojsijasere lilendar hem ano sa e prorokonengere lila.

<sup>28</sup> Sar avena ine paše uzalo gav Emaus, o Isus čerđa pe da mangela te džal po dur.

<sup>29</sup> Ali on terinde le te ačhol vačerindoj: "Ačhov amencar, adalese so lela te perel i rat!"

I o Isus đerdinda ano čher hem ačhilo olencar.

<sup>30</sup> Kad inele olencar uzalo astali, o Isus lelja o maro, zahvalinda e Devlese, phaglja le hem dinda len.

<sup>31</sup> Tegani phravdile lengere jača hem pendžarde le dai ov o Isus, ali ov otokjehvar na inele više anglo lende.

<sup>32</sup> Tegani phende jekh averese: "Na ine amen li sar jag ano vile dok vačerđa amencar odrumal hem objasninda amende o Sveta lila?"

<sup>33</sup> I odmah uštine hem irinde pe ko Jerusolim. Adari arakhle sar bešena zajedno o dešujekh apostolja hem avera sledbenici e Isusesere

<sup>34</sup> kola phende lenđe: "O Gospod čače uštino taro mule hem mothovđa pe e Simonese!"

<sup>35</sup> Tegani o duj manuša vačerde lenđe sa so ulo ko drom nakoro Emaus hem sar pendžarde e Isuse kad phaglja o maro.

*O Isus mothoj pe e učenikonende*  
(Mt 28,16-20; Mk 16,14-18; Jn 20,19-23; Delja 1,6-8)

<sup>36</sup> Sar pana vačerenena ine adalestar, o Isus otokjehvar terdino maškar olende hem phenda lenđe: "Mir tumencar!"

<sup>37</sup> A on but darandile, adalese so mislinde da dikhena duho.

<sup>38</sup> Tegani o Isus phenda lenđe: "Sose darana? Hem sese isi tumen sumnje ano vile?"

<sup>39</sup> Dikhen mle vasta hem mle pre! Me injum! Pipinen man hem ka dikhen! E duho nane telo hem kokala sar so dikhena da man isi!”

<sup>40</sup> Vačerindoj adava, mothovđa lende ple vasta hem o pre.

<sup>41</sup> On edobor inele radosna hem začudime da našti ine te verujinen. Tegani o Isus pučlja len: “Isi tumen li nešto hajbnase?”

<sup>42</sup> I on dinde le kotor oto peko mačo.

<sup>43</sup> Ov lelja hem halja le anglo lende.

<sup>44</sup> Tegani o Isus phenđa lende: “Akavai o lafija save vačerđum tumende dok injumle tumencar: da valjani te pherđol sa soi pisime mandar ano Zakoni e Mojsijasoro, ano Lila e prorokonengere hem ano Psalmija.”

<sup>45</sup> Tegani phravđa lengere jača te haljovent o Sveta lila,

<sup>46</sup> i phenđa lende: “Ađahari zapisime: O Hrist ka patini hem o trito dive ka uštel taro mule,

<sup>47</sup> hem ano lesoro anav ka propovedini pe o pokajanje hem oprostiba e grehengoro sa e nacijende, počindoj taro Jerusalim.

<sup>48</sup> Tumen injen svedoci adalestar.

<sup>49</sup> A me ka bičhalav tumende e Svetone Duho, sar so mlo Dad obećinđa. Ali ačhoven ani diz đikote o zoralipe e Devlestar naka huljel upra tumende.”

*E Isusesoro uštiba ko nebo  
(Mk 16,19-20; Delja 1,9-11)*

<sup>50</sup> Tegani o Isus legarđa ple učenikonen paš uzali Vitanija, i vazdinđa ple vasta hem blagoslovinđa len.

<sup>51</sup> I sar blagoslovini len ine, cidinđa pe olendar hem legardilo ko nebo.

<sup>52</sup> A on pele ko kočija anglo leste, i ani bari radost irinde pe ano Jerusalim.

<sup>53</sup> I stalno džana ine ko Hram te hvalinen e Devle.